

始



第十二

手書全覽以書韻本

庫籍整理外寄贈本

皇清奏議卷五十四

請杜大臣言利之漸以重國體疏 乾隆二十八年

葉啟豐

掌浙江道監察御史臣葉啟豐謹奏為請杜大臣言利之漸以重國體事竊思督撫身任封疆重寄保境安民興廢舉弊其間籌畫動支務思大體不得巧稱酌劑致開科歛之端前因廣東總督蘇昌奏請撥解粵東稅契銀一百二十餘萬併圍基堤岸鹽羨生息銀二十九萬餘兩浙江巡撫熊學鵬亦有請將商捐辦差餘存銀兩解交內府之奏欽奉 諭旨訓飭恐各省督撫未能盡喻著通行

傳諭知之欽此仰見我 皇上如天睿照至公至大之

聖心臣閱邸抄竊照兩江總督尹繼善江蘇巡撫莊有恭會奏酌籌修理下江通省城工一摺內稱江省城垣



例動匣費修理上江因匣費不敷有開捐勸捐之請現在
辦理甫有頭緒查下江未修城垣共三十餘座約需工料
銀八十餘萬應請仿照安省開捐之例又稱修城原以衛
民亦應自衛各屬地方豈無好義急公之人願出餘資共
勸善舉又稱查各州縣開設典當從前每年有資送地方
官當規近年悉行革除所省實多茲當興工各隨資本之
多寡分別捐輸衆擎易舉等語業蒙 勅部核議應飭
部臣查辦外伏思國家取民有制經費有常開捐一例或
因地方水旱凶災重大等情權為救時之計並非著為憲
典我 皇上軫念民依每遇大工大賑發帑捐租動經
鉅萬細核江省城工事非甚急計其所費亦滄海一粟耳
原不應有開捐之請况我 朝重熙累洽海宇乂安曠古
無比數十萬城工之費豈屑取給富戶仰其餘資倡勸捐

之議以為共勸善舉殊乖政體乃該督等稱修城衛民亦
應自衛查設官分職所以庇民城池為封守攸關隍壑繕
修衛民正以衛國而乃稱應令自衛所奏實屬非經至於
各州縣鹽當規禮既經禁革該督等奏請將當商近年所
省規費分別捐輸以為衆擎易舉尤屬非體此項陋規在
不肖州縣或有因公派收之事尚應立掛彈章今以城工
之費一旦籌算及此是戒州縣之官貪而為督撫者反欲
借以開利藪此誠何心且下江既援上江開捐勸捐之請
則他省工程有似此應行興修者勢必輾轉援引踵事漸
增伊于胡底似非 全盛之世所宜有也再查勸捐事例
准行樂輸者固皆實力急公而經手之州縣恐非盡實心
潔己萬一因此居奇陽為勸導陰肆婪索假 朝廷之德
威肥私家之囊橐戶商等業已捐輸不敢控訴縱該督撫

精明留心查察且恐難以周知再或因新例初行稍存迴護其於吏治民生所關更鉅臣愚以為江省因城工開捐勸捐等款似不可行所有應修城工等項伏乞 皇上勅令該督撫等另行妥酌辦理庶他省不得援例以請且可杜言利者巧為覬覦之私矣

議濬復漳河故道疏 乾隆二十八年 方觀承

直隸總督臣方觀承謹 奏為漳河亟須濬復故道恭摺奏明情形仰祈 聖鑒事竊查漳河由河南臨漳縣入直境經廣平大名二府屬地方至山東館陶縣與衛河合乾隆二十六年秋汎於臨漳所屬之沙莊北岸漫溢下游成安廣平大名原城四縣數百村莊被水成災經臣題報蒙 恩賑恤嗣經臣與河南前任撫臣胡寶琛各委道府會勘由兩省藩司公議挑淤築壩使水歸故道比因漫

口在臨漳而為患仍在直境成安等四縣士民情願捐備工料今臨漳士民亦出一段按五股均攤協力辦理工竣並經臣移咨豫撫委員會同直隸汛員駐工防守上年入夏以後水由正河已屬循軌因閏五月雨水連綿盛漲疊至草壩被衝過溜臨漳境內羊羔村以上八里已刷有河形過此則散漫於成安廣平大名元城各境內水至大名復分五股旁溢於山東邱縣復入直隸之廣宗由鉅鹿歸入寧晉泊內臣委永定河同知滿保前赴漫口詳加察看前工祇因就正河淤處挑濬而建壩處所又稍覺兜灣水勢下墜致被衝刷現在漫口溜走七分正河溜止三分今應將河頭改上百餘丈使之迎溜得勢其下河身淤處挑比漫口加深約長五百丈於河頭分流處堅築大壩長一百八十丈高一丈截其北溢之路又於壩東接築土堤長

五百餘丈底寬六丈高一丈攔截河灘抵正河而止估需工料銀八千餘兩據該道府議稟此次不便復用民力大名道楊開鼎大名府姚之德廣平府周元理並所屬十七州縣情願公捐副用業於上冬購備物料臣於新正遴派永定河熟習樁埽弁兵二十二名前往關會豫省擇於開凍後興工趕辦三月內完竣尚不致有誤秋耕詎新任彰德府李訥臨漳縣張光熊忽生異論謂築壩則逆流倒灌不但臨漳城淹沒堪虞即附近村莊恐先歸於烏有惟有因其自然於下游廣大所屬多開支河引入大河等語具覆大名道轉稟到臣查臨漳縣逼近漳河其為患與否惟視河流之通塞與河莊漫口築壩全無關涉今築壩開淤使水歸正河一路則濁河不致分勢有水緩停沙之病兩省均有利益是以前工兩省合辦臨漳出夫直省給值工

完之後委員會同防汛官均無異議今不過將所挑河頭移令迎溜所築之壩移近河頭與上次所辦並無二樣何至利害頓殊輒相沮格蓋因該府縣皆非前此經辦之員又見臨漳改溜處所已成河形水有約束遂罔顧下游數邑田廬淹浸直欲以隣為壑耳查正河經流一百數十里現在深通所議挑河濬淤工作祇五百餘丈乃該府欲於下游多開支河引入大河所稱支河惟元城義井村以下十餘里悉係平田何能另開河道容納全漳語既乖謬至其詳請咨商會勘意在遷延不辦以兩省公同勘定之事何須另勘且連年被災之地豈容又誤秋田臣已飭交大名道府督率辦理並恐彼處無知士民窺見府縣意指藉端阻撓議於成安廣平附近村莊撥夫前往尅日興工一面將下游元城館陶交界地方移會東省查有停淤一律

疏浚深通以暢尾閘之勢但事關隔省臨漳縣府皆係新任既存畛域之見又復不諳河務合無仰懇 皇上天恩勅知新任河南撫臣葉存仁飭委原辦之河北道吳虎炳會同大名道楊開鼎悉心妥辦臣並俟葉存仁赴任經過保定之時與之面論事宜一併飭屬遵照所有該處河壩情形理合繪圖貼說恭摺具 奏

酌籌蘇松太三屬疏濬事宜疏

乾隆二年

莊有恭

江蘇巡撫臣莊有恭謹 奏為酌籌蘇松太三屬疏濬事

宜仰請 聖訓事竊臣在浙撫任時適上年秋雨稍多

風潮稍大湖水漲越二旬退不盈尺親赴嘉湖一帶察勘

知由水歸太湖之路不暢並疑下游歸江歸海之路亦或

有壅閼曾遣浙員來江查勘究以事在隔省難得確切因

先將浙省通湖漕港必如何大加開濬不致積水難消飭

行司府籌畫議詳曾經恭摺 奏明正議舉行臣又蒙

恩命調撫江蘇經浙閩督臣楊廷璋撫臣熊學鵬用臣

前議請將湖州府屬之七十二漕酌用民力以時疏濬奉

旨允行並於摺內聲明江南之太湖出水之處有無

淤塞應否疏濬咨臣查明行辦臣自上冬受事即為博訪

周詢并遴委留江效用原任知縣張世受等遍歷蘇松太

各屬確勘由湖歸江由江歸海之路窮源竟委循幹達支

將何處壅閼應與開寬何處淤淺應加深濬並為酌估需

費茲據陸續繪圖開摺前來臣綜覽全局竊見太湖居蘇

常湖三郡北受荆瀘南受天目諸山之水匯為巨浸而分

疏之大幹則以三江為要三江者吳淞江婁江東江也東

江自宋已湮逮明永樂間開黃浦江寬濶深通足當三江

經吳江震澤吳縣元和崑山新陽青浦華亭上海太倉鎮



洋嘉定十二州縣之境其間港浦縱橫湖蕩錯雜大概觀之無處不可通疏無地不可分洩亦可安於無事然百節之通不勝一節之塞數港之洩不及一港之壅則其勢必有所阻查太湖出水之口不特寶帶橋一處如吳江之十八港十七橋吳縣之鮎魚口大缺口為湖水穿運入江之要道亦無不淺阻又如入吳淞之龐山湖大斜港九里湖澱山湖淑浦等處向稱寬濶深通大資宣洩邇來民間貪圖小利遍植菱蓮圈築魚蕩亦多侵佔臣本年正月因查勘松太海蕩親至劉河竊見現在河形大非昔比舟楫來往必艤舟待潮崑山外濠為婁江正道淺狹特甚蘇州之婁門外河為江原出運咽喉河面僅寬三四丈不等平時無事雖無關礙偶遇秋霖四水滙入江身淺窄先為本境之水所佔必俟境水稍退然後河水得出而上淤已多所

淹矣東南財賦重地水利民生大計急宜早治今臣籌所以治水之法其運河以西太湖出水之口但就其有港可通之處為之清釐佔塞規仿田額務使分流得以迅速但其運河以東三江故道除黃浦為浙西水口現在尚屬深通但於泖口挑除新漲蘆墩三處足資暢洩無庸大辨外其吳淞江自龐山湖以下婁江自婁門以下凡有淺狹阻滯處所疏浚寬深務於上源所洩之數足相容納其江身中段一切植蘆插蘄及冒佔水面之道查明盡數剷除嗣後仍嚴為禁止其有去海太近建置非宜難於啟閉者另為酌量改移務令啟閉得宜足資宣洩而海口之淤亦將分挑而自去凡所應辦之工臣與司道再三籌酌業已粗具規條第工段較長約畧估計所需雖覺浩繁然散在十二州縣通力合作亦所出無多此本為田疇起見如興舉

有成無論業佃皆得永叨利賴民間聞有此舉皆樂於趨
事願以民力為之但用民之力慎選董事分段督修仍需
官為督率若待鳩集財用而後興工不無稍稽時日合無
仰懇 皇上天恩准於公項內先行借動酌籌辦理於
蘇松太三屬得沾宣洩灌溉州縣分年按款照數徵還則
民力可紓大工可期速集如蒙 恩允 臣當親與道府
大員再加覆勘估需數目立定章程另行具 奏並即於
今冬漕務事竣以次興工務於二三月通工歲事則東南
億兆咸感沐 皇仁無既矣

陳河工辦料章程疏 乾隆二十八年 高晉

江南河道總督臣高晉謹 奏為敬陳河工辦理章程仰
祈 聖鑒事竊惟河工以修防為要修防以物料為先
向來南河辦料有林稽葦柴二項先期動帑交各廳採辦

以備次年修防之用而林料有交州縣分辦者五月發辦
之料名為鹽河上游七八月發辦之料名為頭關九十月
發辦之料名為二關至物料交工有限十月完半歲內全
完者有限十一月完半次年正月全完者更有限正月完
半三月始行全完者款項名目既參差不一到工亦遲速
不齊舊料未清復領新帑料未到齊即以開工致貽工料
物挪新掩舊拉後扯前牽混糾纏最易滋弊 臣仰蒙

皇上天恩畀以河防重任事事凜遵 聖訓時時留心

整頓伏思河防惟緊要大工需用物料必俟臨期酌量購
辦難以預為計定若夫各廳歲修工程所需料物惟鹽河
上游頭關二關之分其實同一購柴並無區別與其分立
名目多定期限致滋牽混之弊何若隨時發銀早為採辦
統限年底到工一概稱為購料不但事歸簡易便於稽查

而各廳冬收料物春做工程亦可杜其弊混臣於上年各廳州縣領辦物料時即督同揚徐二道嚴定章程按限查催不拘何項料物統限十二月底全數運工報查並於霜降後水落歸槽兩岸工程底裏畢露之時專委各道參游分投前往各廳將凡有應修之處逐細核查分別先後緩急多寡預為估計冊造核定臣於各廳料物到齊之後又復親往周歷稽查原估未妥之工立即更正並將一切舊存新辦正雜各料按數點驗抽堆盤丈不使稍有短少牽混今工俱估定料物齊全次第興修工程可期堅固將來大汛屆臨亦得專心防守於河務甚有裨益惟是河工積習相沿已久若不奏請著為定例仍恐因循觀望臣請嗣後河工每年歲搶修辦料統於夏秋核明各廳工程之險易需料多寡酌定銀數葦柴於四五月間發辦林稽於七

八月間發辦俱名為購料所有向來相沿鹽河上游頭關二關名色悉行冊除其交工限期均限十二月底全數到齊貯工概不准展限如逾限不完即將承辦之該廳州縣照降三級調用之例嚴行叅處該管道府罰俸一年仍將未完料物查明如果實欠在民在蕩著落接任之員押令叅員催追完報倘有侵挪虧空等事即照虧空錢糧例嚴叅治罪如此督催之道府辦料之各員咸知遵守而名目既已畫一料可依限到工一切挪新掩舊等弊皆可盡除矣臣知識淺陋是否有當相應恭摺具奏

請涼莊移兵酌留疏 乾隆二十八年

楊應琚

涼莊將軍臣巴祿陝甘總督臣楊應琚謹奏為據實密奏仰祈 聖鑒事竊臣等接准 廷議令將涼莊滿洲蒙古兵丁三千三百名携眷移駐伊犁等因除現在將移

駐各項事宜詳議條款另摺奏請 訓示外臣等伏查伊犁地方田土沃腴水草豐美兵丁遷移至彼既於生計有裨且有行圍打牲地方堪以操練技藝洵為馭遠強兵之盛舉是以臣巴祿於宣布 諭旨之時官兵靡不踴躍惟是料理遷移需費繁重凡移往兵丁必須人悉精強斯於地方有益而錢糧亦歸實用今查涼莊滿洲蒙古兵丁自移駐以來幾及三十年其中有年老殘疾家無次丁頂補不得不仍留錢糧養生者更有兩代或一代寡居家無成丁不得不將幼子挑補甲缺以資養贍者此等甲兵現在涼莊雖於營伍未有實益而 國家曠典念係滿洲世僕是以優給錢糧養贍今若一併移駐伊犁亦仍須仰賴 國家養贍而自涼莊至彼程途遙遠轉須多糜 帑項料理資送未免重複滋費且此外尚有本身雖強壯而

父母年老殘廢難以長途携同移駐者凡此數項俱係實情臣等身任其地既悉此情形敢不仰體 聖懷悉心詳籌期於妥協竊思此等老疾孤寡幼稚之戶移往伊犁既無實用莫若酌量存留以節遷移之繁費且各該兵丁自蒙 皇上特恩遇有病故准其在外埋葬並為無力之人動項置地營葬以來伊等率皆立有墳墓難以動移又不忍拋棄若酌留有人則凡移往伊犁官兵亦可將墳墓轉託照料更必心無牽挂果於前往實於公私交有裨益臣等公同詳細商酌應請將應移涼莊甲兵三千二百餘名之內查有別項年老殘廢孤寡幼稚之戶酌留五百名統歸於涼州駐劄並於每兵額設馬匹內裁去二匹以省供之並照山東海州駐防設立城守尉歸青州副都統管轄之例將協領改設城守尉一員其餘應需官員按照

營制酌留就近歸寧夏將軍統轄如此庶移駐之兵悉皆精銳既足以壯新疆之營伍而帑項亦不致虛糜臣等愚見如斯是否可行出自 聖裁非臣等所敢擅便

議移駐滿洲蒙古兵事宜疏

乾隆二十八年

巴楊應琚

涼莊將軍臣巴祿陝甘總督臣楊應琚謹 奏為遵

旨會同詳議具奏事臣等竊惟我 皇上自奠定新疆

以來一統宏無外之規萬年協大同之治自巴里坤以迄

伊犁等處俱成內地允宜選移精銳以照寄重股肱茲蒙

聖主為兵丁營樂利之謀為疆域永苞桑之固令將

涼莊滿洲蒙古兵携眷移駐伊犁俾得熟習技藝俱成勁

旅仰見 睿謨宏遠 恩鑒周詳臣巴祿於接准

廷議之後即傳集官兵宣布曉諭一面 奏明於正月二

十五日自涼州起程於二月初七日至肅州將一切應辦

事宜會同臣楊應琚悉心籌酌伏查涼莊現駐滿洲蒙古

官兵三千三百餘員名係由西安移往駐防迄今幾及三

十年仰蒙 深恩養其丁口滋生日盛計本身連家

口共一萬七千餘名口今既定議移駐伊犁道路遙遠家

口繁重凡製辦行裝與沿途應需車馬盤費等項自應按

照定例參以旗兵現在情形詳細妥籌俾官兵長途不致

拮据而於 帑項又得搏節臣等謹酌議條款恭呈

聖鑒

一應需俸賞查向例官兵派撥出口俱給與俸賞銀兩以

資製裝之用上年派撥察哈爾兵一千名連家口發往伊

犁駐劄經軍機大臣奏准官員賞給一年俸銀兵丁照換

防索倫兵每名賞銀二十兩之例酌量稍為加增將製裝

銀各加十兩賞給伊等妻子伊等本身仍各賞銀二十兩

在案今涼莊滿洲蒙古官兵携眷移駐伊犁事同一例應請即照前例官員各按品賞給一年俸銀兵丁每名本身賞給二十兩外加十兩賞給伊等妻子共賞銀三十兩至官兵跟役並請照例每名賞銀二兩以資製辦行裝一應需馬匹車輛查官員向俱設有本身例馬馬兵亦有額設本身自立馬匹今移駐伊犁應令官兵本身及跟役俱以原設馬匹乘騎毋庸另議外惟步兵並無馬匹請照例自涼莊至哈密每二名連跟役給車一輛其自哈密至伊犁應需換給馬匹之處查本年臣楊應琚會同尚書臣永貴覆奏綠營兵丁換班事宜案內酌請兵丁自哈密至防所應需馱載駝隻折給價銀聽其自備俟到防後分別道路遠近將路遠之庫車以西及伊犁繳還十分之三分作二年坐扣庫車以東各處減半扣繳分作三年完項在

案今前項步兵自哈密至伊犁酌請每名給馬一匹即照前例每匹照依定價折給銀八兩無論馬匹騾驢聽其自行購備其跟役脚力無庸另行論及俟至伊犁仍令繳還十分之三分作二年坐扣庶辦理較為簡便至官兵眷口內多婦女幼稚必需給與車輛乘坐查上年安西提標前後二營官兵携眷移駐烏魯木齊案內其眷口無論人口大小每三名給車一輛今前項官兵所携眷口自涼莊至伊犁亦請無論大小口每三名給車一輛惟是滿營官兵所帶行李鍋帳較多迥非綠營情形可比今雖照例給車乘坐其一切行裝實憲難以攜帶酌請每戶再量為添給車一輛俾得裝載行李鍋帳等項以示優恤一應需盤費查上年安西提標移駐烏魯木齊官兵眷口係照從前內地移駐安西兵丁搬眷之例每百里每大口

給盤費銀一錢二分小口六分今涼莊滿營官兵移駐伊犁其眷口所需盤費應照前例支給至官員本身仍照例按品級支給鹽菜銀兩並照應帶跟役名數每名月支鹽菜銀五錢兵丁本身月支鹽菜銀一兩五錢其兵丁所帶跟役因係全家搬移其中或有一兵跟役至二三名者雖不便按名支給鹽菜銀兩若查照向例每名二名合給跟役一名實屬不敷酌請每兵一名無論所帶跟役多寡止准量給一名月支鹽菜銀五錢其官兵暨跟役仍每名各日支口糧八合三勺至官兵所帶跟役現既議給鹽菜口糧不應復請支給盤費致滋重複

一應需鍋帳查哈密迤西各站並無旗舍官兵暨眷口至彼之後沿途住宿鍋帳在所必需查上年察哈爾移駐伊犁兵丁經軍機大臣奏准每戶給帳房一頂折給銀四兩

鍋一口折給銀二兩在案今前項兵丁携眷移駐伊犁應請照例一體折給鍋帳銀兩令其自行製備其官員應需鍋帳亦請照例按品折給以資住宿

一經行道路查前項官兵携眷移駐伊犁業經 廷議俟明歲起作為三起每年移駐一起自應遵照辦理其應由何路行走之處查自巴里坤以至西烏魯木齊尚未設有臺站現在新疆往回官兵俱由闡展一帶經行今前項官兵自涼莊起程行抵哈密之後亦即由闡展烏魯木齊臺路前赴伊犁庶沿途便於照料以上各條臣等再四詳細面同商酌意見僉同謹合詞恭摺具 奏伏祈 皇上 睿鑒 勅議施行

議散補漢軍兵事宜疏 乾隆二十八年 楊應琚 奏

涼莊將軍臣巴祿陝甘總督臣楊應琚謹 奏為遵

旨會同詳議具奏事乾隆二十八年正月十七日承准
廷議內開查現今涼莊駐防滿洲蒙古兵移駐伊犁其餘
漢軍兵一千即不成部伍漢軍既有出旗為民之例請飭
交該將軍總督或令出旗為民或調補綠營俱聽其自便
奉 旨依議臣巴祿臣楊應琚悉心籌酌除滿洲蒙古
兵携眷移駐伊犁之處現已詳議條款另摺具 奏外伏
查涼莊現駐漢軍兵丁係同滿洲蒙古兵丁俱由西安移
往駐防今計現任協領以下驍騎校以上並候記名休致
等官共三十六員領催三十八名馬兵六百二十七名砲
手十七名匹役頭目二名匹役二十二名步兵二百六十
八名養役兵三十二名共計兵糧一千六名蓋自經移駐
以來幾及三十年滋生較前繁盛仰蒙 恩旨令其出
旗為民或調補綠營糧缺聽其自便臣楊應琚前在兩廣

閩浙任內查辦漢軍出旗業經辦有成例今與臣巴祿即
行仿照閩廣已定章程詳細參酌臚列條款恭呈 聖
鑒訓示

一散處為民之戶應令定其所往省分給與印票也查漢
軍官兵內如有情願散處為民之人應准其呈明所往省
分州縣令涼莊地方官照例給予鈐印手票交所往之處
編入民籍與戶民一體考試婚配立業謀生仍將為民戶
口造冊咨明部旗以備查考
一調補綠營兵應在附近營分酌補也查漢軍兵丁內如
有情願調補綠營糧缺之人自應於附近營伍內遇有兵
糧缺出分缺挨次輪補俾該兵不至在旗日久守候而於
綠營民兵餘丁挑補之路亦無妨礙始為妥協今臣等查
得甘撫標陝甘二提標及陝提屬之靖遠協與寧夏涼州

西寧肅州河州等五鎮暨所屬各營俱坐落甘省境內凡有願調綠營之人均可就近調補如該兵在旗原係領催馬甲並有馬之匹役頭目俱令改補馬糧若原係步兵匹兵養育兵俱令改補步糧並查陝甘二提涼肅二鎮經前督臣吳達善奏准改為馬六步四如遇馬糧缺出陸續相間裁汰改募步兵等因今應將此等裁馬改步營分遇有馬糧缺出酌擬以四缺為一班第一缺坐補軍營著有勞績移咨拔補之步守兵丁第二缺裁汰改步第三缺補放出旗馬甲第四缺拔補存城步兵其並無應裁馬缺營分遇有馬糧缺出以三缺為一班第一缺坐補軍營步守兵丁第二缺補放出旗馬甲第三缺拔補存城步兵至陝甘二提標並無守兵遇有步糧缺出應以二缺為一班第一缺補放出旗步甲第二缺拔補軍營及存城病故兵丁子

弟其餘有守糧各營分遇步糧缺出應以三缺為一班第一缺坐補軍營守兵第二缺補放出旗步甲第三缺拔補存城守兵及病故兵丁子弟如遇而復始挨次拔補以示均平仍將此等調補綠營之戶亦令地方官給與鈐印手票並造冊咨明部旗存案其子弟食糧應試婚配悉照散處為民之戶一體辦理

一請酌給賞項以廣皇仁也查閩廣奏准漢軍調補綠營如綠營原有兵房者每兵賞搬移銀二兩無兵房者賞賃房銀六兩其搬移他往之窮苦閑散戶口每戶賞資本銀八兩又閩省奏准調補外標營之甲兵除搬移賃屋銀兩仍照原議分別賞給外其家口按其多寡每名口每百里陸路酌給銀三錢各在案今涼莊調補綠營甲兵並

窮苦閑散戶口均請照此分別給賞至如涼州甲兵調補涼州鎮標暨城守營以及莊浪兵調補莊浪營均無需路費止分別賞給搬賃屋銀兩其調補外標營者則程途較遠携眷前往需費即多請照例除分別賞給搬移賃屋銀兩外仍按其家口多寡每名口每百里酌給銀三錢以資脚力路費至此項銀兩並請在司庫內不拘何項先行給發將來出旗截曠項下撥還歸款

一請給還馬匹以示優恤也查閩廣出旗甲兵每兵自立馬三匹業經奏蒙 聖恩准其領回在案今涼州事同一例應請一體 加恩給予領回俾遷移不至拮据益必永矢銜結

一出旗官員酌請分別改補也查閩省出旗章程現任官員自防禦以上送部引 見候 苗另補驍騎校無

庸送部即以綠營千總改補筆帖式情願改武者考驗弓馬以綠營千總把總補用清字外郎已滿八年與筆帖式由清字外郎考取歷俸已滿八年者均咨部以縣丞補用又粵省候補筆帖式並記名領催均以綠營經制外委補用各在案今涼莊出旗官員亦請照依此例分別辦理俾得乘時効用再查乾隆八年定例漢軍改隸民籍世職准其帶往歸入漢人班次補用其進士舉人生監及候補候選降調官員並捐納職銜人員應照伊等職銜與漢人一一體考試錄用等語今涼州出旗人戶內應請查明現有職銜照例一體辦理此內如原任降調副都統仍帶騎都尉世職陳世泰係由大員降調應如何錄用容臣已祿給咨送部引 見恭候 欽定以上各條臣等再四商酌意見僉同謹合詞恭 奏伏乞 皇上睿鑒 勅議

施行

陳賑務情形疏 乾隆二十八年

朱績經

巡視天津漕務御史臣朱績經謹 奏為敬陳賑務情形
畧抒一得仰祈 聖鑒事竊臣巡視天津漕務目覩地
方官辦理賑濟事宜有可酌改之處並應格外周恤者敬
為我 皇上陳之

一碾米放賑宜防滋弊也查被災州縣有存倉米石及撥
給漕米者率用米賑濟其距水次稍遠地方一時撥運未
到即將現貯倉穀給放地方官向皆將穀發交鋪戶每穀
一斗繳米五升五合以五升作報銷五合糶解充公鋪戶
多以粗米交官州縣查察少疎即被欺朦是以貧民所領
碾米穀色遠遜漕米且以穀碾米州縣之收發鋪戶之領
納節次煩擾管倉人役保無串通舞弊等事臣愚以為碾

穀放賑之各州縣其未發之穀請以穀折米如應給五升
者准給穀九升酌扣穀一升充公貧民領穀聽其自行碾
米比之官碾較為實惠兼糠粃並濟食用於災黎更有小
補

一酌借籽種請通融周恤也查上年被水地畝現今涸出
者遵奉 恩旨分別借給籽種近聞濱水之區有乾涸
在前民間先已播種春麥萌芽未發突遇暴風激浪致被
浸損者此等地畝地方官拘泥成例以曾經具報種麥在
先不在此次具報周恤之例第實歉之餘民力正困請地
方官查明實在無力地戶一體酌借籽種於水退時督率
補種以冀有秋

一貧民留養局請隨地兼收外來流移一例量加恩撫也
查被水地方外出貧民故鄉既無常產資送更無實際蒙

聖明洞鑒周恤民隱在籍者疊邀賑恤外出者聽謀生理矣但流民所至地方例無給賑雖公所粥廠皆可就食而老弱無依窮途不能自存者亦有之伏查直省州縣皆有留食局原為貧病無依之人設立其現在奉行者一縣設有數處收養百人至二百餘人不等但各地方辦理不一或有希圖節費少事外來流民不肯收留又因時屆春融多議停止應請 勅下督撫通行有司不得拘於成見查有入境流民老弱病困無計謀食者一面據實具報即准入局留養與現在收養之人量行展限俟四月麥秋後聽其隨便傭趁再議停止倘經費不敷准酌量動支公項歸於展賑案內報銷其先在他方暨後聞賑歸來之民亦令本籍州縣實戶口增入冊內俾得均霑 聖澤沿途得所依托歸里又有資生似亦安插流民之一法以

上三條臣自到津後就近體訪謹就所見情形陳其愚昧是否可採伏乞 皇上聖鑒

請除賑災通弊疏 乾隆二十八年 顧光旭

浙江道監察御史臣顧光旭謹 奏為請除辦災之通弊以責實效事竊照直隸山東上年偶被偏災荷蒙 聖恩軫念民依先後截漕發帑加賑再賑疊沛 恩膏仰見我 皇上如天之仁惠愛元元之意無微不至近見鄉村流戶扶老挈幼紛紛至京入春以來尤多故五城米廠及飯廠內人數較去冬有加詢其由來皆近京數百里內逃荒就食之人臣因訪聞京外被災各州縣居民相率流徙或毀屋伐樹鬻賣男女不可勝計饑羸老弱困阨道路纍纍不絕即聞見之所及如此則餘外各州縣情形可知伏思救荒無奇策惟在督撫大吏及有司親民之官皆

以全副精神赴之方克有濟乃各州縣未嘗不設廠散賑未嘗不分別加賑而或委任於佐貳假手於吏胥所設之廠又或遠離村鎮四鄉窮民奔走待食等候無時因之殞斃者皆所不免是國家良法美意一入俗吏之手而民之得沾實惠者什不及五且各州縣既不實力辦荒即有一二賢能有司能撫循其境內而四遠流民間風畢集屯聚日多轉令賢者亦難於措手此則該督撫無真實愛民之心貫注於下而其下應付塞責一切設施皆具文也方今春和已至農事將興而災民正及青黃不接之時業蒙恩旨於停賑之後概予加賑一月臣請 勅下該督撫加意撫綏土著隨地安集流民務令各遂生謀去年被淹之地積水未盡消涸急宜設法宣洩強壯者既可以工代賑老弱者毋致失所然後照例借給牛具籽種以資

耕作則農登有兆而民氣可復倘仍前因陋就簡虛應故事農有散亡之憂地有不耕之產即當重治該督撫之罪至現在京城外來流民仰賴 聖主鴻慈已得赴廠領賑但小民一年之計專賴東作其有無力回籍者或應查照成例咨送其有本籍全無依靠不能回籍者或歸入大宛二縣加賑案內一體給賑宜作何安輯不致棲流無著之處伏乞 皇上勅下順天府尹會同五城御史查明人數造具清冊妥議具奏抑臣更有請者外省遇水旱偏災大員親臨查勘州縣官先以伺候供應為急其所委佐貳微員或更滋擾累無益救荒昔朱子提刑浙中查勘災荒深山窮谷無所不到而單車所至吏民不知詢為查荒良法請嗣後大員親臨災地州縣不必供應亦不得輒委佐雜等官以致滋弊倘有絲毫騷擾該督撫即嚴叅重處

即赴府翻府審批結又赴省控何處控訴即住何處祠堂
即用何處祠費用竣復按戶派出私財任意侵用是祠堂
有費實為健訟之資同姓立祠竟為聚訟之地欲弭訟端
不得不清其源而塞其流也臣查民間祠堂如係建於本
鄉時祭饗而聯絡族誼設公費以教養子弟乃係敦尚古
道實為美俗可封若遠於府省地方祭饗無聞族誼不泯
其屋宇則傍宿健之徒其公財則積為逞訟之費頽風敗
習莫此為甚况查所建府省祠堂大率皆推原遠年君王
將相一人共為始祖如周姓則祖后稷吳姓則祖泰伯姜
姓則祖姜尚袁姓則祖袁紹有祠必有譜其纂輯宗譜荒
唐悖謬亦復如之凡屬同府同姓者皆得出費與祠送其
支祖牌位於總龕之內列名於宗譜之冊每祠牌位動以
千百計源流支派無所擇出錢者聯秦越為一家不出錢

者置親支於局外原其創建之初不過一二好事之徒藉
端建議希圖經手侵漁訪其同府同姓或聯絡於生
童應考之時或徧走於農民收割之後百計勸捐多方聳
動愚民溺於習俗樂於輸助故其費日集而多其風日踵
而盛初成廣廈置之空間歇訟聚賭窩匪藏奸不可究詰
近於省會祠中復經拿獲私鑄案犯臣查禮稱大夫不得
祖諸侯豈有民人而可妄祖前代之君相據禮已宜查禁
况濫觴至為聚訟之數甚而窩賭窩匪無所不有尤難聽
其流弊無所底止臣現今通飭各屬查明果係該縣土著
實有近祖可考歲行祭祀者仍准其存留外其餘荒遠不
經之始祖既係附會神亦不享非類應將牌位查燬譜並
削正其外府州縣奉附之支祖舍其本籍裡祀寄主府省
竟作餒而之鬼為其子孫者當亦難安應將牌位撤回至

其廢祠房間若不隨時削跡日久保無復立應令改作平房鋪面不准本姓棍徒阻撓或實有願留為該姓應試生童公廨尚屬可行倘准留之後仍有訟棍盤踞及窩賭窩匪情事除嚴拏本犯治罪外即將其屋宇入官或作堆鋪或給未建衙署之員弁居住此外尚有一種本省外省各姓公宇雖未供設牌位名似稍異而實則相同應亦照此一律辦理嗣後永遠不許添建府省祠堂公宇其有實係敦本支而睦宗族者祇許於本鄉本村以時饗祀庶幾禮教可明訟源可滌而民生日厚矣

覆奏查辦江西祠譜疏 乾隆二十九年 輔 德

江西巡撫兼提督銜 臣 輔德謹 奏為查辦祠譜完竣恭摺覆奏事竊 臣 前奏江西民人妄聯姓氏釀金剏立公祠構訟種種流弊應行查辦緣由一摺仰蒙 諭旨特頒

一體禁治更荷

訓示諄諄毋得僅以文告奉行故事

臣惟有敬謹欽遵實力查辦當將欽奉

諭旨緣由徧

行出示曉諭一面通行闔省州縣各令在於境內逐一詳查並為愷切曉諭俾知異族合祠擅起訟端妄祖君相在家在國均干罪譴今蒙 聖主恩加格外免其深求已

為該族大幸若再遷延隱匿則按法論擬定不可違並恐州縣視為具文不時查催指斥責令該管知府就近嚴督妥辦 臣 復細加體察緣江省各屬在在有祠由來甚久其中同宗嫡屬建於本籍鄉城者尚為尊祖敬宗而收其族此意未嘗不善而流弊之壞則由於同姓建祠而起今查同姓之祠雖不能追其所歸大概由單姓寒門欲矜望族或訟棍奸徒就中漁利因而由城及鄉由府及省處處邀約斂費創立公祠隨竄附華胄冒認名裔而不肖之輩爭

相倣效遂至不一而足至建祠餘貲或置田產或貯錢穀多有借與同姓愚民倚祠加利盤剝租息積於無用於是因其有費可動宗祠可居動輒興訟既肆其強梁復恣其饕餮獄訟繁興奸匪藏聚實由於此其荒遠不經之木主則由各送木主入祠多係各家之祖乃復近溯古初得姓之始及攀援往代有名之人以為公共之始祖而各族專祠因亦轉相效尤非刊立木主即載入譜首以為榮耀其有近祖可考者反置之於不論是以各譜世系尚多接續可考獨其始祖則遙遙不相涉蓋本係從後妄行擬入者也今飭查其木主並吊驗族譜其祖及唐宋者已為近代而兩漢以上唐虞三代顓頊軒轅稱為始祖者比比皆是甚有祖及盤古地皇者又有古之姦逆人所不齒如董卓朱溫之類尚為祖宗者更有正史不載僅見於稗官野史

實無其人如雷震子之類者亦皆奉為始祖其借越荒唐鄙俚悖謬實為已極臣不料江西文物之地而於祖祠根本一事遂至於此今據各屬開摺具稟前來臣彙總查核計同姓共建者八十九祠一族獨建者八千九百九十四祠祠有荒遠不經之木主者一百七十祠譜載荒遠不經之始祖者一千一十六姓又公宇一百四十一處業將同姓共建祠內所立木主概令各自撤燬所置田產及其祠屋均令自行覓售將價各自分回間有別無售主者聽其歸於一族或改民房鋪面或作考試廡所及堆貯貨物之用總使根株悉絕不致復萌故習公宇亦照此辦理其荒遠不經之木主及圖像匾聯悉行撤燬所有譜首譜序荒遠不經之始祖及字樣名目一概剗削並毀其板斷以始遷該地及世系分明者為始祖均令另行改正送官鈐印

發還遇有爭訟飭以印譜為憑並據各屬稟稱當傳該族面諭時將其僭妄荒唐之處逐一指明曉事者皆知悚懼惶愧且有將譜自行削正送印者足見人心之明原屬不昧此番辦理似於頽風陋俗一為廓清至各專祠之有祠產者計六千七百三十九處除僅敷祭享外其有餘者共計七百六十處皆取具遵依為教養子弟傾助族中貧乏婚喪之用不得以為訟費除仍飭地方官隨事留心如有於族中藉祠斂費者即加懲治以杜訟風外臣復通行嚴示此後敢有仍建同姓公祠及一族崇祠設有荒遠不經之木主匾聯者即將祠屋入官並重治其罪其有於譜首仍載荒遠不經之始祖字樣者亦一併嚴行治罪俾知名分不容少假寬典難以再邀互相提撕共為遵守庶妄誕之風永息而尊親之義益明矣所有臣欽遵 諭旨查

辦完竣緣由理合恭摺 奏明並將查明祠譜各數分別

彙開清單恭呈

御覽

請復絲劬出洋舊例疏 乾隆二十九年楊廷璋定長

閩浙總督臣楊廷璋福建巡撫臣定長謹 奏為遵

旨議奏事乾隆二十九年欽奉 上諭臣等跪誦之下

仰見 聖主遠鑒如神為閭閻籌畫生計至周且備伏

查絲劬一項數年以來價值原極昂貴乾隆二十四年仰

蒙 聖主俯准臺臣李兆鵬等條奏將絲劬嚴禁出洋

並准部議將綢緞絹一律嚴禁節年實力遵行在案原使

留有餘於內地俾物多價平於民生日用有裨臣等於奉

文飭禁後竊意從此絲價自必日減乃自二十四年禁止

出洋以來迄今五載不特絲價依然昂貴未見平減且偶

值蠶事成稍薄價值較前更昂推原其故總由 國家

承平日久百數十年生齒日繁民間需用日多物價有不
得不長之勢誠如 聖諭生齒衍繁取多用宏蓋物情
自然之勢也查向來販洋絲勛均不過土絲及粗糙之絲
祇堪供織土綢而不足供紗緞綾羅之用祇應粗絲價昂
而細絲價減今無論粗細絲勛一律昂貴其非關販洋已
可概見且不特此也即以產地而論浙省之杭嘉湖及紹
屬之諸暨產絲最盛每屆新絲出後江浙粵閩販絲客民
挈本而來者甚多所產粗絲頃刻得價售賣農民轉覺生
計裕如今奉禁之後絲價未見其平而粗絲消售轉滯於
農民反有轉售不速之苦再查外番船隻載貨挾貨遠赴
內地原欲以其所有易其所無而各番首重者絲勛今因
禁止販洋近年粵閩貿易番船甚覺減少即內地販洋商
船亦多有停駕不開者在外番因不能置買絲勛運來之

貨日少而內地所需洋貨價值亦甚見增昂是中外均無
裨益臣等悉心體察竊謂絲價之低昂總視乎蠶事之豐
嗇蠶收稔則絲價自平蠶收歉則絲價自貴固有自然之
勢今蒙 聖主燭照民隱 勅下臣等悉心體察應
否即行開禁臣等伏思禁洋而絲價過減有益於民自宜
永行禁止今奉行已五年之久絲價迄未平減徒使外番
以織絨不供紛紛瀆請而民間又乏銀貨流通之益實屬
兩無所便伏讀 聖訓以天下之物供天下之用尤為
通商便民大哉 天言誠中外一體之遠模也應請
特頒諭旨將販洋絲勛照舊弛禁但開禁之後若不定
以限制竊恐商民惟利是圖知外番缺絲已久一經弛禁
必紛紛不惜重價買運新絲赴洋內地不免有絲少價翔
之患似非稱物平施之道伏查乾隆二十八年琉球國請

聖主格外施恩准其歲買土絲五千觔二蠶湖絲三千觔此係出自 特恩且係一國一歲所買之數今絲禁一開商販船隻多寡雖屬難定每船各有配買絲觔一至外番積少成多即足供其織絨臣等愚昧之見應請定以海洋内外商船每船止許配搭土絲一千觔二蠶粗絲一千觔此外不許多帶並不許兼帶細絲影射蔽混俟三年之後內地不致絲少價昂再請酌增觔數至絲觔既蒙 恩准其帶往則外番俱可自供織絨其內地已織之絀緞紗羅絲棉等項應請仍照舊例禁止出洋留為內地之用以免價值騰貴之虞其稽查之法應責成各海口關及沿海各汛口文武員弁逐層查驗先令海關驗明絲觔粗細觔兩如無影射多帶情弊收稅後即予印照註明絲觔數目再令出口之處及沿途各海汛文武官弁會同查

驗屬貨照相符方准開行設有奸商於額定觔數之外多帶及將細絲混作粗絲並夾帶細緞紗綾絲棉等項者不拘何處查出即照原例按多帶觔數分別充軍徒杖治罪汛口文武官弁如不實力稽查致有影射侵漁之弊即分別失察故縱嚴揭叅懲如此弛禁之中定節制之限或亦因時調劑之一法也緣奉 諭旨飭議謹就 臣等管見所及恭摺議 奏

陳陝西地方積貯疏 乾隆二十九年 明德

陝西巡撫 臣明德謹 奏為敬陳地方之情形籌備常平之積貯仰祈 聖鑒事竊照陝西一省東通晉豫西連甘蜀分設六府六直隸州內惟西鳳同三府地處中原田疇平行民尚殷庶邠乾二直隸州稍偏西北界接甘省雖山多田少地瘠民貧但係通途大路彼此接濟尚不為難

至於省城南北皆係山鄉省南數十里即係終南山東連驪山秦嶺華嶽西接太白岐山以至棧道綿亘七八百里漢中一府興商二直隸州及所屬一十九州縣均在其內其間層巒疊嶂萬山叢集路徑崎嶇跋涉艱險深林茂密虎豹盤踞故各邑居民稀疏耕讀之外別無營運生計率多貧窶然處處皆有山泉農民種稻不慮缺水且山中出產竹木可以為薪蕨粉橡子可以救饑兼之漢丹二水可達楚豫萬一有所需用撥運亦易是漢興商三府州屬倉儲尚非緊要惟省北百餘里即係北山袤延千有餘里延安一府廊綏二直隸州及所屬一十四縣坐落其中在在土坡沙嶺草木不生泉源絕少舟車難通而小民墾耕者皆係山坡之地平原曠土十無一二每值三春恒憲缺雨夏秋多患雹霜其北至米脂靖邊兩路出山則係沿邊榆

林府屬五州縣及延安府屬之靖定二縣地雖平坦又多沙漠是延榆廊綏四府州屬不惟本地倉儲關係緊要抑且仰藉於西同一帶而西鳳同邠乾地居適中本省隣省咸資撥濟其常平積貯所關尤重必須儲蓄充裕方稱有備無患陝省額貯常平倉穀雖有二百七十餘萬石但邊陲之民每歲春耕籽種口糧借資於官倉者常不下數十萬至百餘萬石若額貯之數再有虛懸倘遇水旱不齊必致無所倚恃臣與司道再四籌酌並商之督臣楊應琚謹列籌備倉儲以裕民食五事敬為我皇上陳之

一各郡應建設府倉以廣儲蓄也查各府首縣雖設有常平然一官經理不能過多且所屬州縣環處郡城府倉有備遇有需用撥運亦便故各省多有建設府倉廣為積貯以備應用者前因山西太原首府及甘肅蘭州等九府未

建府倉經臣先後奏請俱蒙聖恩俞允添設於民食大有裨益今陝省之西延鳳漢榆同六府尚未建設府倉似屬無備若以捐監倉費添建倉廩以捐監之糧積貯郡倉則各府常平漸致充裕民食有所利賴查西安府為省會首郡同州府地當扼要應請西同二府各收捐監穀八萬石延安鳳翔榆林三府地方遼濶屬邑較多應請各收捐監穀五萬石漢中一府屬邑雖有但地方潮濕難以多貯應請收捐監穀三萬石以上六府共請收捐監穀三十四萬石定為六府常平額貯均以收捐監糧補足其所需倉廩亦動收捐倉費陸續建蓋再查延榆二府屬州縣例准外省生俊報捐今添設府倉延榆二府自應照屬邑一例辦理惟西安等四府屬向止許本省生俊捐納今新添府倉與州縣本省存貯者不同若必待本地生俊捐足

恐致徒延歲月難收實效應請將西鳳漢同四府亦照延榆二府之例均准外省生俊報捐其該四府所屬州縣仍照舊例止准本省生俊捐納再知府不時盤查出投捐之人未便令其守候滋弊所有府倉收納監糧應令各該首縣查收以專責成如此則六郡常平無需請動帑項不數年間各府積貯均屬有備矣

一西安等五府州捐監穀數應畫一減定以收實效也查乾隆九年議定捐監穀數係各就彼時市價酌定今經二十年糧價較前漸昂是以生俊裹足不前報捐寥寥於倉儲無甚裨益且原定亦有未甚允當之處即如西安府屬與鳳翔府屬地方毘隣乃西安府原定每俊秀一名捐穀一百一十四石零而鳳翔府屬原定一百九十一石零多寡懸殊即同州府屬捐穀一百九石零邠乾二州屬捐穀

一百二十二石至一百二十九石零以目今之時價而論均屬浮多查榆林府屬每俊秀一名捐穀八十石七斗五升延綏二府州屬捐監穀數較多經臣暨布政使方世雋先後奏請均照榆林一例收捐荷蒙 恩允各在案今查西同鳳邠乾五府州屬常平積貯不惟貯備本地抑且撥濟隣省與其動缺之後撥帑採買莫若量減捐數俾生俊踴躍爭先庶 帑項不致糜費而地方又省採買之繁應請將西同鳳邠乾五府州屬捐監穀數俱照延榆綏一例定為八十石七斗五升其廩增附等生俱照例遞減如此則要地倉儲投捐有人積貯充裕民食有賴矣一省會重地收捐監糧應變通辦理以濟兵民也查西安省會為清漢重兵駐劄之地商民輻輳烟戶衆多食指浩繁首邑咸長二縣雖額貯常平倉穀各七萬五千石除兵

民借欠撥運平糶外實貯在倉者僅各二萬餘石會城要地實屬無備若非廣開捐路省會倉儲斷難充裕應請將咸長二首縣照依延榆綏之例亦准外省生俊一體報捐其餘外州縣仍照舊例止准本省生俊捐納如此則省會重地倉廩有備於兵精民食均有裨益矣一直隸鄜州及所屬收捐監穀應照延榆綏一例辦理也查直隸鄜州及所屬之洛川宜君中都三縣均在省北金鎖關之外其氣候之寒冷山地之瘠薄與延榆綏三府州無異榆林府屬原定每俊秀一名收捐監穀八十石七斗五升延綏二府州屬亦經先後奏准照榆林一例減定並准外省生俊一體報捐各在案惟鄜州及所屬三縣俊秀一名當收捐穀一百三十九石四斗故生俊人等無不舍多就少均赴延榆等縣報捐以致輸納無人倉儲虛懸臣

查該州縣等常平額貯自八千石至一萬七千餘石不等四州縣僅額貯穀五萬四百餘石止抵大縣一邑額貯之數兼乾隆二十三、四等年以來收成稍歉兵民借欠以及平糶未買糧石外現在四邑僅存穀三萬餘石若不亟請調劑設有需用必致撥自他處不惟糜費錢糧抑且緩不濟急。鄜州及所屬三縣既與延榆綏地方情形相同應請照延榆綏三府州之例畫一減定每俊秀一名收捐監穀八十石七斗五升其廩增附等生照例遞減並准外省生俊一體報捐則山僻難運之地倉儲均得充裕而民食咸資利賴矣。

一沿邊七邑平糶倉穀應量加買補以實倉儲也。查延安府屬之靖邊、定邊二縣榆林府屬之榆林、葭州、懷遠、神木、府谷等五州縣地處沿邊土多沙漠各色農民全賴租種邊外地畝以資生計春出秋歸歲以為常故民多貧窶戶鮮蓋藏每年春耕除借給籽種口糧外尚需平糶以濟民食且邊外鄂爾多斯蒙古偶有荒歉亦需官倉接濟沿邊倉儲必須廣為儲備方於地方有益。是以前撫臣陳宏謀於乾隆二十二年奏准將沿邊七邑原定常平倉穀各五萬石在案。惟因原議內有過有平糶解價報撥字樣以致數年以來平糶價銀均各解司撥用。臣查沿邊七邑邊內地畝雖屬沙瘠而邊外地土在在肥沃每遇豐收農民頗有餘糧若必俟捐監補足其額缺較多之處難望收捐足額而平糶之價又不買補未免失時且旋捐旋糶不行買補即捐足之處三年之間仍致虛懸終無充足之日。應請嗣後沿邊七邑春糶價銀俱照例解置府庫俟秋收後查明倉儲充實收成稍歉之處將糶價解司報撥如額數尚

虧年豐價平之處即動用糶價買補還倉如此分別辦理則倉儲得以充實而邊氓有所利賴矣以上五條臣為地方積貯關係緊要起見謹會同陝甘督臣楊應琚合詞恭摺具奏是否有當伏乞 皇上睿鑒訓示

請禁採買短價疏 乾隆二十九年

尹繼善

兩江總督臣尹繼善謹 奏為請禁採買短價之弊以除民累事竊查直省各州縣設立常平倉積貯穀石定例春糶秋還蓋以平市價而防紅朽也各州縣於秋成買補之時自應按照時價秉公採買方不致於病民乃向來州縣採買倉糧多有按田強派不照市價平買而承辦之書役家人又藉端勒派尅扣分肥其中弊端不可枚舉臣與撫臣屢行出示嚴禁復於巡行之便隨地隨時留心體訪業將失察書役短價病民之眚昭縣知縣陳述祖及無為州

知州嚴道洪臣與安撫臣託庸先後題參並將舞弊之書役嚴行審擬從重治罪以昭炯戒臣思採買穀價本有區別如撥缺存倉米穀應動司庫正項採買原定每米一石止銷銀一兩二錢此係歷來定例遵行已久自應仍行照例辦理至平糶米價各處情形不同皆係貴時出糶價平買補價值原屬寬餘本不至於累民其所以受累者皆因立法不善稽查不嚴故得勝混作弊臣與江南江西三省撫臣藩司悉心籌酌立定章程於應出糶之時令將價值先行詳明及屆秋成應行買補之時其出境採買者令將往何處採買產地時價若干先行詳報稽核其在本地採買者令將現在按照時價實在發價若干先行詳明本管道府加結轉詳臣等留心查核訪問民間如糶價買價與所報不符即嚴行提究審實將道府一併嚴參如果公平

採買俟買補還倉之後價有盈餘全數解司充公遇有撥缺存倉米穀應動正項採買其定例一兩二錢之數不敷時價者奏明於所存盈餘內撥補此臣嚴行立法者清理積弊之情形也伏思去歲安撫臣託庸奏請將安省存倉穀石碾米運京一摺欽奉 諭旨與其輾轉挹注名異實同又何如即以此留之民間俾饗殮饒裕仰見 聖主誠求保赤念切痼瘼凡所以為民食計者無微不至 恩旨下頒凡窮鄉僻壤無不交相傳頌感激涕零夫州縣採買米穀即使公平交易我 皇上尚慮挹彼注此必致米價踴騰閭閻滋累况每歲春糶秋還又何可從容官吏短價營私以致年年受困臣雖殫竭心力立法禁止但恐奉行不力日久懈弛且臣所轄三省前弊多不能免仍恐他省亦有類此者仰懇 聖恩特頒諭旨將短價

採買之事勒石嚴禁俾大小官吏觸目警心庶可永除民累抑臣更有請者每年平糶倉穀定例存七糶三原令各州縣知有界限不至漫無節制以至倉廩空虛並非令其每歲必拘定出糶三分也乃各省州縣每多拘泥定例一屆青黃不接毋論年歲豐歉價值低昂紛紛詳請糶三上司衙門亦因與例相符多有批准就一省計之存穀不下一百五六十萬石若拘糶三之例每歲必須糶出四五十萬石一屆秋成設遇歲有不登糶價不敷採買即不能歸還原額縱使豐收而民間生穀止有此數各屬同時採買至數十萬之多亦恐米價踴騰致妨民食有不得不量為變通之勢臣再四熟籌既欲防範於今日使買補不至累民更宜慎重於先時使倉穀不輕出糶應請嗣後各省州縣凡存倉米穀除實遇歉收之年米價過昂非糶三可濟

民食者不妨額外多糶准其據實具詳酌量辦理其尋常
歲稔價平之年不必拘定糶三之例或竟可全數停糶或
止須酌糶十之一二總看各處情形臨時酌辦庶春間少
賣一石則倉內多一石之積儲秋成少買一石則民間多
一石之米穀似於民食倉庾兩有裨益臣仰遵 聖訓
體察民艱既於此事知之甚確不敢不愷切敷陳伏乞

皇上訓示

請申明囤積之禁疏 乾隆二十九年

王檢

甘肅布政使臣王檢跪 奏為請申明囤積之禁以便民
生以裨荒政事竊查例載富戶於收倉之後如遇有積至
十萬石不即售賣任該地方官勒令出糶並設法稽查毋
令商販囤積居奇又例載先給銀錢預定糧石巧取射利
者按律治罪等語蓋以奸徒壟斷有妨民食是以酌加議

禁也至於秋成之後公平糶買此實有益無損之舉可以
毋庸查禁夫小民終歲勤動全賴未稼登場上供國課下
給身家幸過年豐穀賤之時富民出資以易糧貧民因糧
而獲利儲之本地可備緩急於將來運之他方亦可通有
無於隣境即使其敢於居奇閉糶增價地方官察知情形
亦無難喻之以理繩之以法出其所有而減價以糶則本
地之糧仍供本地之用豐歉皆易於調劑矣今地方官不
繹例義凡遇收買糧食概行查禁在殷實之家固不敢違
例干罪而小民日食所需取資於此又勢不得不多方求
售於是狡黠之徒勾結胥役非彼莫糶任意捐勒既巧取
其糧石又復朘削其價值此穀賤傷農鄉民所以有熟荒
之諺也若偶遇災祲銀米兼賑而市無餘糧所領之折色
艱於購買則辦理更覺掣肘臣愚以為奸徒牟利法固宜

嚴而商民糴糧事本無弊仰祈 皇上勅下直省督撫
轉飭地方官除積糧至十五萬石敢於閉糴暨先給銀錢
預定糧石仍按律治罪外其餘聽民自便如有混行查禁
以致地棍蠹役因而滋事者照失察衙役犯贓例議處如
此分別辦理庶幾商民皆利豐歉得宜酌盈濟虛有便於
民生而亦可少裨于荒政矣

請緝捕責成大員疏 乾隆二十九年

輔 德

江西巡撫兼提督銜 臣輔德謹 奏為武職同任緝捕應
並責成大員以收實效事竊惟設兵原以衛民安民重在
靖匪先於乾隆二十六年前任江蘇撫臣陳宏謀奏請通
省營員皆令督率兵丁協同緝捕則境內竊匪不獲於捕
役即獲於兵丁等因經部議覆通飭遵行嗣於上冬陳宏
謀復經奏請營兵所獲賊犯到案狡供許令同原獲營員

質審則真賊自無所逃如係良民被誣並無贓證兵丁營
員咎無可辭等因恭奉 諭旨著照所請行欽遵亦在

案伏查州縣額設捕役多者不過十名少者數名偵緝勢
難周到是以責令營兵協緝城守有駐防大路有塘汛耳
目衆多足資巡緝立法非不盡善如果實力遵行匪賊終
難遁跡惟是外省奉行多有不力而不力之故由於氣習
未除文武之不能一體也蓋將弁多以竊案不比強劫有
疎防之虞而兵丁不同捕役又無提比之例既為賞罰所
不及即每置身於局外且以文員最忌營汛獲賊通報上
司即形其短憲生嫌隙遇有營兵犯竊一經縣捕拏獲即
不肯以革伍在先及該營自拏並營縣會拏等情代為捏
飾難免處分更恐縣將營拏之賊故行審訊轉詆營兵多
事妄拏輒多畏葸以致兵丁意中熟悉之賊與目中日見

之賊並某捕叅縱分贓皆概括於胸臆而莫敢出諸口蓋
恐該營將弁聞知不以為奮勉轉以為多事而其本管營
汛間有不法兵丁或陰通匪類或得規縱放或坐地分贓
轉不知畏干處分時加嚴察即有迫於奉文飭緝者率多
任聽兵丁或拏曾經犯案之人或將乞丐塘塞其實緝獲
正賊正贓者甚少此武員之狃於積習相沿不能一體也
至於州縣每以兵丁獲賊形己之短遽將賊犯巧為出脫
現已定有會同原獲營員質審之例固已不敢逞其伎倆
乃又有矯枉過正明知兵丁妄拏以奉上司文檄飭緝曲
作周旋故留地步徒使兵丁滋擾良民此又文員之故習
多端不能一體也臣以為欲收同任緝捕之實效必使文
武一體又必責成於督撫提鎮大員然後可宣明賞罰破
除故習而使其全局轉移咸歸於一體臣嘗細察地方文

武官弁大概不論職分之應為惟視上司之意指大員鄭
重其事羣情自然振動臣到任以來屢經通飭將文武積
習逐一指出禁其心存畛域示以所定賞罰並移商南昌
贛州兩鎮臣除拏獲山賊隨時酌量給賞外如係多贓及
搶劫重案或能舉發捕役叅縱分贓及查獲積窩者守兵
立拔馬戰馬戰記拔外委外委記補千總千總以上則另
記名以備酌保至於巡緝弁兵俱飭該管營員揀派仍令
不時考察毋許藉端嚇詐挾嫌妄拏其並不實力久無根
獲者即令營員隨時懲處畧仿比緝之意俾知賞罰皆由
於此而又皆由提鎮親定更無輾轉退縮有所希冀畏懼
不得不認真查緝計自春間會辦以來營兵拏獲賊匪將
及百案又拏獲逃軍三名俱經飭縣審辦其有任兵藉捕
索詐混拏私拷之把總二員兵丁數名亦經查出立即斥

革重處是弁兵之功過原可隨時勸懲豈可以一二弁兵不肖即謬慮干連公然袖手遂致因噎廢食第弁兵之勤惰固在將備稽查而將備之錮習端在督撫提鎮之隨時振刷并以賞罰為鼓舞之權則徹底貫通一無扞格查各省督撫每屆年終已未獲盜若干及作何懲勸之處已經大學士兼管總督事務臣尹繼善奏經部覆通行外合無仰懇 聖恩 特頒諭旨再令提鎮一體親加督率不時就近查考以課其實並令各就本營情形酌示賞罰共相實力整飭則積習更易破除良法不同故套不惟竊匪難以漏網且捕役亦懼營兵攻發不敢包庇即歷年通緝各犯未必不併弋獲臣因文武緝捕務求實效起見不揣冒昧謹恭摺具奏伏祈 皇上聖鑒訓示

請伸民枉以杜刁風疏 乾隆二十九年 吳綬詔

山東道監察御史臣吳綬詔謹 奏為請禁收准民詞仍批原問州縣覆審會審之積習以伸民枉以杜刁風事竊照州縣一官與民最親凡詞訟全賴審理然往往有聽斷未平下情冤抑因而赴愬上司者亦有逞刁健訟於結案後復飾詞越愬者近湖南新寧縣民傅帙罷市一案伏讀 聖諭以該署府既不親審又不委員仍發交本縣辦理將原告禁押致成事端仰見 睿照如神無微不燭惟外省積習大抵皆然臣每聞府道以上收准呈詞多批本州縣自行審詳即別委他員亦令原問官會審如本年二月間山東高唐州民高上忠所控知州馬而良各款蒙 欽差侍郎臣四達前往查審結案而據原呈所稱則一控於東昌府仍批本州查報兩控於巡撫批行司道仍皆委員就本州會訊以致有不審被告獨囚原告等詞其

明證也夫小民如果受屈必由州縣偏向徇私執意難回亦不得已而上懇今反令覆審則其忿怒摧折固不待言若既委他員仍復會同審訊在原問官勢必自護前非且差役皆其牙爪氣奮刑求小民恐無能畢其詞委員又何從證其枉扶同瞻徇亦遂不得不然非惟冤抑莫伸更增一誣告之罪及上司依詳批結而立案已不可動搖矣更使情真罪當而屢折於原質之庭重科於會鞠之地且不足以服其心又况健訟者流藉口本官不肯自翻已案捏詞越瀆屢訴不休則訟端更無由平刁風因之益熾甚至脅衆肆橫抗官玩法種種事端皆緣此起殊非所以仰體我皇上慎重民讞明聽庶獄之至意也伏思督撫等統制全省若因所屬呈懇即據一面之詞輒行關提猶慮於民未便至於道則分巡府則嵩轄自當察其情偽重者

親為提審餘亦嵩委別員隔訊以免冤縱乃向來積習相沿未有禁止臣請 勅下直省督撫以下凡收准民詞與本州縣有干涉者即委該管道府覆審其道府收准民詞即吊取卷案提集人證親行訊究至案內如遇有檢驗查勘應差委等事令其遴選賢員不得仍會同原問官如此庶小民之抱屈者易於伸雪其捏飾越懇者待上司別訊得實加以重懲自必俯首畏法不敢行險僥倖而刁風亦可少息矣

皇清奏議卷五十五

皇清奏議卷五十六

請崇獎名賢疏乾隆三十年

李因培

倉場侍郎留江蘇學政任臣李因培謹奏恭逢
駕時巡江浙問俗省方清蹕所經凡前代名賢遺跡
既已並荷褒揚今鑿輅在吳臣謹博採舊聞核
其有關名教者三事伏祈聖明俯賜採擇加以崇獎
不特名賢祠墓千古增輝實於風俗人心不無裨益臣謹
條具如左

一宋臣朱長文樂園書院請賜額題右臣伏見宋秘
書省正字吳縣朱長文博聞強識篤學力行少擢乙科恬
於進取築室樂園著書其中晚起本州教授遷大學博士
教人先經術後詞章與孫復胡瑗後先相望生平著述有
功羣經今雖不盡傳而名目俱在宋史其遺書四種子孫

錄版流布學術深粹已見一斑其樂園舊居在宋已賜額
歷為名蹟我 皇上臨馭之初並蒙給帑修葺其地近
在城內 鑾輅所經仰祈載錫 宸章俾先儒邀一
命之榮曠世慶千秋之遇 臣謹將長文遺書進 御並
參考米芾表及宋史郡志採摭事蹟另寫清單恭呈
睿鑒

一宋臣韓世忠靈巖墓道請 旨量加修治右 臣伏見
宋太師靳國忠武王韓世忠墓在靈巖山琴臺西麓高丈
餘左約半里有宋孝宗所立中興佐命定國元勳之碑趙
雄為文周必大書當紹興勅葬之初即於墓所立廟後廢
明宏治十一年知府曹鳳復立尋又廢嘉靖二年知府胡
瓚宗以世忠舊宅在郡城內南禪寺左乃就立廟焉今墓
南直下平地五六畝瓦礫散布蓋曹鳳立廟遺址張習碑

記斷卧荆榛而城中之廟在滄浪亭畔乾隆十六年蒙
聖恩頒賜匾額世忠祠廟輝光惟邱壘尚虞薪採仰祈
皇上勅下所司量加修護俾忠義之氣與山川相映
發焉

一宋臣文天祥蘇郡專祠請 賜額題右 臣伏見宋丞
相信國公文天祥以德祐元年兼知平江府事是時元勢
荒張天祥拊循百姓選將練兵期為臨安作屏蔽會獨松
關告警朝議撤天祥入衛遂率兵亟行去數日而城守王
邦傑以城降吳人既重天祥忠義又以天祥不去平江必
可守守平江以號召常潤諸州臨安事尚可為遂建祠祀
天祥明正德十年巡按謝琛請於朝賜額忠烈初在吳縣
永豐倉北嘉靖二十年巡按饒天民改建今所 本朝雍
正七年乾隆二年先後給帑修葺天祥子孫家吳者世董

祠事康熙年間撫臣湯斌以明翰林待詔徵明大士震孟
祔祠在乘鯉坊正一圖亦祈 欽賜 御書俾精忠
大節益光天壤

籌辦巡防海洋事宜疏乾隆三十年

高晉
莊有恭

兩江總督臣高晉江蘇巡撫臣莊有恭謹 奏為遵

旨籌辦巡防海洋事宜請立章程以資緘靖事竊臣莊有
恭審辦洋盜龔大等定擬具 奏一案與前督臣尹繼善
業將遵奉緣由會摺奏 聞其如何嚴立章程督屬巡
防搜緝不致日久視為具文及沿海荒僻地方如龔大等
刦殺數命畧無聞見之大渤口等處應如何撥守派巡以
重責成以資查察之處遵即飭行司道悉心籌議去後茲
據該司道等轉據沿海各府州各按地方情形議覆前來
督臣尹繼善未及會商核定臣高晉蒞任與臣莊有恭悉

心籌核除南匯一營向係水師後改陸路今應酌復舊制
量移汛守事關營制汛防臣等會同提臣再加商定另摺
具 奏外所有酌定章程及現在奉行條例有應酌加更
定之處敬為我 皇上一一陳之

一商漁船隻給照之例宜酌變通以崇實政也查例載商
漁船隻造船時呈報州縣官查取漁甲戶族里長鄰佑保
結方准成造完日報官親驗給照開明在船人年貌籍貫
初出口時必於汛口掛號將照呈驗填註日月蓋印放行
回籍時仍於本籍印官處送照呈驗違者治罪各等語立
法非不周詳嚴密但出海之船惟商船南販粵閩浙江北
販山東直隸錦蓋等處遲則經年往回速亦半年所領照
內舵水人等更換既少且各挾有資本並無本船為匪之
事檢查歷來搶刦之案俱係採捕漁船而漁船或二三月

一出或一月數出其在船舵水人等類皆臨時僱覓議給長短工價斷不能經年常養在船今責令船主於成造完日報官親驗時將在船人年貌籍貫開明給照勢難預定則開報必多不實若易一舵水即令其隨時呈報恐又繁瑣難行徒滋需索是以出口時按照查驗每多人照不符而賄放偷渡之弊轉因之以起所有漁船舵水人等並填照內之文幾同虛設應請嗣後除商船仍遵定例將在船舵水人等並填給照外其漁船止將船主年貌姓名籍貫及作何生業開填入照并將船甲字號於大小桅蓬及船旁大書深刻仍於照後多留餘紙俟出口時即責成守口員弁將該漁船前往何處作何生業並在船舵水年貌的實姓名籍貫逐一查填入照蓋印戳放行並將所填人數照登號簿遇有一船為匪則在船之年貌籍貫皆可按簿

而稽如照給匪人則將地方官叅處查填不實則將守口之員弁叅處如此分別辦理則漁船給照不同虛設一稽查出入宜兼責成海關各口也查例載船隻出洋稅關衙門先驗看地方印照然後給牌有妄給者亦照地方官例議處是設立稅關匪特專司稅課亦本有盤察稽查之責况海洋為匪皆係漁船漁船出口必由該關換票進口亦必該關繳票在關員役果能盤詰維嚴其匪踪賍跡亦斷難掩飾惟是該關委員吏役以為稅課之外非其專責故或漁船而載有商貨或鮮船反帶有醃貨皆不加究詰以致漫無覺察應請嗣後海關所有口岸凡一切倒換照票查驗人數登填簿照蓋印戳放行並進口時稽查諸事責成該委員吏役兼司查辦如有人照不符船貨互異即送地方官審究如失於覺察匪船闖入審明係由何處

孝五十一
口岸有委員者即將該員照盤查不實例議處無委員者
即將該吏役責革仍酌加枷號治罪如此則稽查更為嚴
密於防奸之道實多裨益如關口委員吏役人等藉端刁
難需索仍行分別參究

一外洋失事因免其會勘以杜推諉以省羈累也查海洋
失事如在內洋尚有某山某河可以指目若在外洋不見
河岸本無一定疆界可以指畫惟海舟以六十里為一更
計自某處放洋行至被劫處所約有里數若干定為何州
縣營汛所轄洋面乃地方汛於定例遇有報失必帶同事
主關行鄰封營縣定期會勘以致千里遠商守候羈延苟
失物無多寧甘隱忍不報如龔大業內行劫鎮字號豆船
無名事主查無報案職此之由且洋面未經勘定則承緝
之責尚無所歸輾轉遷延必至盜逸贓消難於捕獲臣等

查江省洋面自某縣前至某縣計有里數若干各營久已
繪有定圖應將所繪洋圖再加校正飭發瀕海州縣並送
部存案嗣後內洋失事仍照舊例文武帶同事主會勘外
如外洋失事聽事主於隨風飄泊進口之處帶同舵水赴
所在文武不拘何衙門呈報但向隔別詢明由何處放洋
行至被劫處約有里數若干即將該事主開報贓物報明
各該管印官員該文武即查照洋圖定為何州縣營汛所
轄倘有規避處分互相諉卸指使事主捏報他界者查出
即予嚴叅該文武查明洋界一面飛關所轄州縣會營差
緝其事主即予釋寔無容候勘至於詳報督撫衙門無論
內外洋失事總以事主報到三日內詳文馳遞以便據報
經行海關各口將稅簿贓單互相較核有貨物相符者即
可知盜船於何處進口船主何名其稽查關口之員役如

於文檄未至之先能查出匪船拏獲稟報者并則照例議叙吏役則酌量加賞如奉到文檄能按照單簿據實查出飛移所在地方將盜犯拏獲者並免其盤查不實處分如此則辦理簡捷不致羈累遠商而查拏迅速贓盜亦可無縱漏矣

一租船之禁宜分別定例以靖盜源也查例載富民謀利自造商船租與他人及租之者俱各杖一百枷號三個月失察之州縣官罰俸一年此蓋指並未為匪者而言又夾帶違禁貨物例內有船主在籍而船隻出洋有事並責問船主之語其餘別項為匪並無船主作何治罪明文今查各案盜船無不出於租賃除船主知情分贓者應照窩主窩藏例分別治罪外其餘除枷杖之外別無他例可援不足以示儆戒嗣後租船為匪船主即不知情應請亦照夾

帶違禁貨物接濟外洋原保結之人杖一百徒三年例議以杖徒船隻入官充賞其失察之地方官並請照原例加倍議處如船主實有事故不能親自出洋別令親屬押駕出洋者許赴地方官呈明取結將親屬開填入照方許出洋如未呈明即以頂冒論罪庶謀利之徒不敢輕于租賃而奸匪亦無從頂冒矣以上數條臣等悉心再三籌核務期事從切實不尚虛文法歸簡要不滋繁擾而於察緝巡防之法更加嚴密合將遵 旨籌辦緣由謹會同恭摺具 奏是否有當伏乞 皇上訓示

查辦豫省上游河道疏 乾隆三十年 李 宏

河南總督現管河東總河事 臣李宏跪 奏為查過豫省上游河道泉源及辦理情形事竊 臣勘核黃沁上南等廳工料順赴上游等處查勘奏明在案 臣經歷河南陝州復

由孟津渡河而北至濟源懷慶輝縣各府州縣審察河勢源流並歷年水浪大小查得黃河發源星宿自積石以下至陝州之龍門砥柱兩岸崇山高岸河不為患砥柱以東峭壁橫河水從石出名曰三門總而計之寬不過七八十丈關鎖洪流勢甚湍急至孟縣兩岸漸無山岡河面寬濶約計數里北岸之涉縣南岸之滎澤縣始有堤工防衛北有丹沁兩河由涉縣木灤店滙入黃河南有伊洛瀍澗四河由鞏縣洛口滙入黃河源遠流長河面亦寬每遇雨多水發亦俱挾沙而行勢甚浩瀚是以南河廳屬之胡家屯楊橋等處溜勢忽來忽去最為緊要迤下各廳河道順軌東流惟因土性鬆虛逢灣掃刷究之臨河工段有限易於修防若黃河與沁洛之水同時並漲則大河漫灘兩岸工程節節均須防護乾隆二十六年七月沁洛等河長水一

二丈水頭甫至寧夏又三次報長水文餘同時並下勢若建瓴兩岸處處受險者職此之故若黃河與沁洛之水先後長發則大河儘可容納工程易於修防本年夏間伊洛等水並未長發六月初十日寧夏長水至五尺二寸已在沁河水發之後維時三門以上陝州城外臨河之萬錦灘亦長水三尺五寸而下游各廳僅報長水數寸至尺餘不等道遠流微又有三門關鎖是以水勢遞減工程堅固又其明證此豫省黃河之情形也臣伏思黃河來源兩岸山溝汊港滙歸入黃河之處衆多俱在三門以上若三門以下沁洛二支伏秋水發實增黃河水勢之二三是上游長落大小攸關工程平險不可不一體留心以資防衛今查三門係黃河出入之區鞏縣城北洛口為伊洛瀍澗入河總滙臣已咨明撫臣飭陝州鞏縣各立水誌每年挑汛日

起至霜降日止水勢長落尺寸逐日查明登記據實具報其沁河水勢雖由黃沁同知查報但水誌不得其地長落尺寸恐難定準並令該同知在於木灤店龍王廟前另立水誌按日查報如伏秋汛內各處水勢遇有陡長至二三尺以外該廳州縣即迅速具報並查寧夏之例一并飛報江南總河如此上下關會司河之員咸知長水尺寸日期相機修防於工程有益又查濟瀆在濟源縣城西北三里濟瀆廟後泉出涓流不大滙潁河之水由孟縣迤東以達黃河岸高河低有濟無患又大舟河發源於山西高平縣至河內縣之舟谷口築有攔河碎石壩過大舟河之水使由小舟河歸衛濟運壩下設有九堰分為十九渠石隙洩下之水聽民灌田名曰九道堰乾隆二十四年前河臣張師載曾經奏明於碎石壩下舟河尾閘附近沁河之處歲

築土壩一道攔遏水勢今臣細加察勘碎石壩下十九河渠錯出分流甚衆並未全由大舟河歸沁下游土壩不能攔遏徒費民力無益於事此後應停其修築每年春夏之時惟將碎石壩培築高厚以防水衝坍卸其壩底洩水較多之堰用草土填塞嚴密並將斗門以下小舟河不時查看遇有淺窄之處隨即疏濬深通務與進水斗門一律俾舟水暢達衛河以收實益臣已飭該管縣丞遵照辦理又輝縣之百泉係衛河之源蘇門山下衆泉湧出滙為巨浸實漕運之要需南流里許建有斗門三座中為官渠專以濟運西為民渠分灌田疇向例重運抵臨清日封閉民渠使泉流盡由官渠入衛五月以後民間插秧需水二日濟運一日灌田按期互相啟閉六七月間聽民自便立法最善官民並受其利永當遵守章程惟查民渠迤東石壩稍

有坍塌漏水之處將來堵閉民渠泉水未免旁洩不能合入官渠之內臣亦經諭令該管廳汛即將坍塌石照舊修砌堅實不使仍有漏水所有臣查過豫省上游河道泉源及辦理情形繕摺繪圖具奏是否有當伏乞皇上聖鑒訓示

請山西丁糧一體合辦疏乾隆三十年戈濤

巡視中城山西道監察御史臣戈濤謹奏為良法終宜盡行調劑不能無弊故抒一得仰祈睿鑒事竊臣任山西道御史於該省事務時加體察竊見丁銀歸入地糧征收一案各省遵循已久該省獨未盡行伏思丁糧合辦在無地有丁者既免追呼之擾即有地有丁者亦省輸納之煩吏胥不能藉編審為奸小民亦不至以勾稽為累其法簡約均平天下稱便何以該省獨有未宜臣謹就其節

次改歸成案推原始末考較得失敬為我皇上陳之查丁歸地糧自雍正九年試辦之後至乾隆元年撫臣覺羅石麟奏請改歸者十八州縣乾隆八年因鹽臣吉慶條奏議請改歸者十八州縣乾隆二十三年因御史姚成烈條奏又議請改歸者五州縣計三次改歸共四十一州縣其餘則或請將丁銀一半及三分之一歸入地糧或請將丁銀統按下下則征收而以餘額歸入地糧或請將無業窮丁盡行刪除而以其應徵銀兩均勻攤入地糧如此所云調劑辦理者又三十七州縣此外二十六州縣則仍丁糧分徵此歷年查辦之大較也夫以天下通行之良法而辦理獨多參差揆諸畫一之道已有未協且其所謂不可歸辦者或以晉省賦額本重加丁則未免過多或以各屬地土瘠薄併徵則憲有逃亡又以為俯從輿論則民情相

安可以經久且以為間有逃缺而編審既屆可以擦除此數說者臣皆不能無疑查賦額之重無過江蘇而江蘇則丁歸地糧地土之薄無過貴州而貴州亦丁糧合辦何獨異于山西夫有地而稍增其額即憲逃亡若無地而按徵其丁逃亡不更甚乎此尤其易明者也臣竊求其主於分辦之說蓋謂晉民多出貿易故不欲寬其丁賦而重地徵若然則是欲征有力之丁銀因以遍征無力殊失持平之義况無地之民寬裕者終少拮据者實多觀于乾隆元年及二十三年查辦案中所稱祁縣壽陽各有無力窮丁三千七百餘人其他固可概見矣至於待編審為擦補正前撫臣所謂調劑之一法而實則弊有不可勝言者何者在各次辦理之時皆謂輕重適均民無不便及至後次查辦便已多有逃亡即如二十三年所辦其去乾隆八年僅十

餘年而岢嵐州則逃亡六百三十餘丁五寨縣則逃亡二百五十餘丁苟屬民情所安何以逃亡至是是則所謂俯順輿情可以經久特虛語耳然而州縣動以輿情為請者一由紳衿富戶之畏攤丁賦一由經承里胥之貪存編審也蓋分征而不免逃亡必藉編審為擦補而吏胥經手因緣為奸增新丁則放富陞貧除故丁則移甲換乙百弊叢生莫可究詰然則五年編審特為若輩舞文漁利之期而百姓之馱賠包納於未擦補之前者固無論矣臣所謂調劑之終不能無弊者此也夫古今立政固欲順民之情而至於民情所同則又權其輕重貧民之不欲輸丁與地戶之不願增額情同也而輕重大異歷任撫臣固皆從民情起見然而富民之情易達貧民之情難訴臣愚以為與其徇有業之欲何若紓無業之氓與其從傭工負販者而按

徵其丁何若於資生有藉者而稍益其額與其待逃亡故絕而始為之撥補何若攤丁歸地而使之不至逃亡且夫理有可信則事無可疑就三次辦理而論前之所謂難行者後既多有改歸則知後之所謂難歸者原盡屬可行臣請勅下山西撫臣悉心籌辦將從前丁地分征各州縣一體查核歸併即或地有不齊亦祇就一縣中分等攤入毋復瞻顧舊案瑣屑參差如此則丁戶不至逃亡吏胥無由滋弊良法美政歸於大同而無業貧民永沐皇仁於無既矣

請酌改垵糧疏乾隆三十年

鄂定長

湖廣總督臣定長湖北巡撫臣鄂寧謹奏為恭請酌改垵糧以順輿情仰祈聖鑒事竊照湖北地方素稱水鄉除鄖陽宜昌施南三府外其餘七府屬之外臨江河內

濱湖港者所在皆是雨水稍多即漫淹田地歲以為常土人視為固然此等水易漫淹之區大率以水鄉漁糧等則例起科即所有上中下三則地畝亦賦甚輕減且每年水漫掛圩土性加肥來年春收必倍況水退涸出後原可相其節氣以次補種中禾晚禾即遲至白露即內涸出亦可補種蕎粟雜糧等物此濱臨江湖州縣之大概形勢也再查水易漫淹之區固因地勢亦有小民貪利與水爭地以致頻年泛溢者臣等到任後接見該守令等細加諮訪以籌調劑之方據漢陽府守令面稟漢川縣沔陽一區每有水患賑借費繁先據垵民具呈曾有廢堤改糧之議未經舉行等語臣等隨檢查案卷上年前撫臣李因培曾飭司道會同查議嗣經調任未及籌辦臣等與司道再三商議復飭詳悉籌議今據布政司三寶糧儲道李成業武漢

黃德道盧謙據該府縣議詳前來臣等查漢川縣河汊坑在縣境之西北坑內有河汊大湖又聯絡倒灣等十三小湖陸地湖地環錯其間南接彭公蓼湖香花三坑東西北三面圍築長堤七千五百餘丈例係官督民修堤外東為松湖北為慈湖西為竹筒支河東北為德安府府河入松湖之頂衝西南為漢河由竹筒支河入慈湖之頂衝西北為天門縣三臺湖入慈湖之頂衝先年堤外皆植蘆葦藉以散緩水勢迨後生齒日繁小民趨利逐漸砍除蘆葦墾為麥地一經汎漲水逼堤根兼之坑內南首之彭公等三坑地居高卑積水俱滙入河汊湖惟堤之西北隅建有閘口以資宣洩而堤之正北一面內湖之水又直抵堤內外衝刷最為受險以致潰漫頻仍在坑內地畝原因勢居窪下科則甚輕農民惟以春收二麥秋種雜糧為務每年春

麥大概有收迨夏汎漲發潰口之時農民多借以捕魚生計本無所害然坑內尚有紅糧三則田地非盡屬水鄉漁糧是以潰決之年照例報災賑卹並借項修堤即二十六年二十九三十年三次被水蠲免賑借等項已計費萬有餘金而潰口趨時補築自應照官督民修之例第每年竭力修工業民洵屬甚苦是以潰口之後搶築大費周章即無水之年歲修亦復不易蓋緣收麥捕魚既有自然可得之利擇地而處又無飄廬蕩舍之虞迨責以畚插泥土之役自覺格外苛求是以有情願廢堤不築之請查該堤長計七千五百餘丈高僅三四五六尺寬僅二三四五尺形雖綿長而卑薄殊甚向係坑民分上下八總各按地畝出夫分修今欲足資捍衛必須加高培厚但所費甚鉅民修力有不能借帑難以徵補况總計坑內每歲共征各則

銀不及一千三百兩米僅八十餘石通盤籌算節年賑貸浩繁反倍多於額征之數實屬虛糜且在民生既相習水鄉在國計又歲入無幾不如改糧廢堤以便民生而順水性查坑內上八總民田以紅糧上中下三則起科者歲征銀六百十六兩零南米八十一石零又湖地以漁糧上則起科者歲征銀二百三十七兩零又軍田歲征銀一百六兩零屯幫銀六十六兩零軍幫銀四十九兩零下八總民地以紅糧米塘荒地草場等則例起科者歲征銀四十三兩零南米五石零又民地以漁糧中則起科者歲征銀八十四兩零以漁糧下則起科者歲征銀六十七兩零今將上八總民田紅糧三則均改漁糧上則計減免地丁銀九十九兩零減免南米八十一石零其軍田科則較漁糧上則從輕俱有隨征幫費銀兩亦將該軍田改為漁糧下則

計減免銀六十兩零所有原徵幫費共銀一百一十五兩零係辦漕必需應照舊征收下八總民地內雖亦有紅糧但係水塘等則例較漁糧從輕以及原係漁糧者悉仍其舊毋庸議改惟內有應征南米五石零今既改為漁糧應同上八總南米八十一石一併減免以符漁糧則例似此改則起徵該坑內盡屬漁糧科則田地無水之年以地為利有水之年即以水為利任水之自然不與之爭地俾免告災請賑之繁其原有堤塍聽其自便亦省修築傳呼之擾雖現請減免銀米共計二百數十兩較之頻年蠲賑所省實多於國計民生兩有裨益如蒙 天恩俞允 臣等另行飭造減免細冊照例具 題由部臣覆核載入全書永遠遵守 臣等面商意見相同謹合詞具 奏並繪圖貼說恭呈 御覽伏乞 皇上聖鑒訓示施行至此外

沿江臨河有堤垸之州縣亦須調劑者容臣等悉心諮訪
因地制宜從容籌議合併陳明

請除嘗租錮弊疏乾隆三十一年

王檢

廣東巡撫臣王檢跪奏為請除嘗租之錮弊以禁刁風
事竊照廣東人民率多聚族而居每族皆建宗祠隨祠置
有祭田名為嘗租大戶之田多至數千畝小戶亦有數百
畝不等遞年租穀按支輪收除祭祀完糧之外又復變價
生息日積月累竟至數百千萬凡係大族之人資財豐厚
無不倚強凌弱恃眾暴寡如遇勢均力敵之戶恐其不能
取勝則聚族於宗祠之內糾約出門先行定議凡族中門
傷之人厚給嘗租以供藥餌因傷身故令其木主入祠分
給嘗田以養妻孥如傷斃他姓有肯頂充認抵者亦照因
傷之人入祠給田因而亡命奸徒視此械鬥之風以為牟

利之具遇有雀角各攘臂爭先連斃多命迨經拿訊而兩
造頂充各有其人承審之員據供問擬正法正犯又至漏
網奸徒愈無顧忌種種刁惡皆由於嘗租之為厲前經廣
東按察使潘思榘奏請為粵省嘗租仿照宋臣范仲淹義
田之例設立族正族副經營仍飭地方官稽查令其敦本
睦族毋得倚恃爭鬥今奉行多年而該省聚眾械鬥之風
全未悛改臣查檢卷宗前犯之案兇徒多人執持器械更
有烏鎗刀箭各項軍器藐法逞兇莫此為甚且犯案之後
其所舉之族正族副該地方官並未聲明究處臣悉心體
訪蓋緣地方官習尚玩忽其族正族副曾否舉報素不經
心在未經舉報者固自因循錮習即間或舉報而承充之
人又多係狡詐之徒往往肇謀首禍藉端漁利是以錮弊
日深而刁風愈熾也臣愚以為聚此資財適以濟其兇惡

不如散彼田產可以息其鬥爭請將所有嘗租飭交地方官查明村莊戶族據實開報除零星小戶田畝無幾者毋庸查辦外其自百畝以上者傳集族姓公議凡本處城鄉之祠每年祭祀所需酌留嘗田數十畝即於該族擇一安分之人承充族正經理其事嗣後嚴禁添積其餘所存之田有近年捐置者仍歸本人收管如係久遠流傳以及遞年租息所置即按其合族支派均勻散給仍嚴飭該地方官督同族戶親自查辦不得假手胥役致滋紛擾俾貧民有田以資生先徒無財以滋事庶幾地方風俗歸淳厚矣

皇清奏議卷五十六

皇清奏議卷五十七

請嚴私修志書之例疏乾隆三十一年熊學鵬

浙江巡撫臣熊學鵬謹 奏為請嚴私修志書之例以昭信實事竊照志書與史鑑體例雖有不同而皆記事之書將以傳信後世惟是志書中有省志有府志有州縣志大小各別查各省所纂通志俱經進 呈惟府縣志多有地方官私自修輯刊布在好名之地方官名為捐資辦理暗中不無向紳士派費而該地紳士借以行私地方官徇其所囑任意編纂其考核既不切實且或別存愛憎將鄙俚不經之談率行開載將私心偏厚之人謬加贊揚至實應紀載之事轉有遺漏刊布日久以訛傳訛所關於政治人心者甚為重大昨據任滿學政錢維城札稱遂安縣毛一鷺本四明之黨天啟間以附璫與太監李寔同致周順昌

於死後罹逆案而邑志有傳侈陳其政績又嘉興虞廷陞
抨擊正人薦引邪黨卒罹逆案而嘉興府志有傳不書其
附黨而反稱其忤黨又蕭山縣志載嘉靖間學使陳大綬
貪酷無兩又偏不喜青衿凡士與民訟無不責辱士而獎
借民者一月之內不黜數名秀才則食不下咽是年太史
言天狗食文昌文人多殃故浙場太水而士受學使之辱
按陳大綬為萬曆進士由部曹出督浙江學政清節慈惠
最著蓋在萬曆而志稱嘉靖乃指為貪酷無兩且謂天變
因之是非顛倒即飭刪除等因到臣查毛一鷺虞廷陞
二人名列逆黨現載在 欽定明史內而邑乘反侈陳
其美實為是非倒置臣已飭地方官刪除至陳大綬一人
臣未能深悉其居官如何果否清節慈惠最著容臣與新
任浙江學臣李宗文另行查考核實辦理但即以毛一鷺

虞廷陞陳大綬三人而論可見府州縣私修志書內之褒
貶失實者尚難悉舉臣查督撫學臣藩臬蒞任各府州縣
未嘗不有志書呈送然一省之中數十州縣志書加以各
府志書卷帙浩繁不過備存查考其實未能逐篇逐字細
心校閱夫事無專責則彼此因循在督撫藩臬辦理地方
政務尚多惟學臣專司考核事較簡少其按臨各郡考案
發後或在公館或在舟次就近將該處志書與該地方官
論辨考核隨時辦理卷帙既不甚多更屬易辦臣請
勅下各省學臣於按臨各郡時即將該處舊存府州縣志
與該地方官考核所有開載不實不經之處飭令地方官
悉行刪除歲底將刪除條目若干咨明督撫會同奏
聞其地方府州縣官有因舊志漫漶欲行改造重修或舊
無志書欲行添造者悉令預為詳報仍將所修志書申送

學臣會同督撫核明具奏俟旨發回然後准其刊布不許地方官任意私造再纂修志書向係地方官自行捐資辦理更不得藉端派費有累士民如此庶書歸信守而不經失實之語不致貽惑將來矣

密請開墾以裕民食疏乾隆三十一年楊應琚

大學士管雲貴總督臣楊應琚跪奏為密奏請廣為開墾以裕生米之源事竊照滇省山多田少產米有限且在皆山不通舟楫並無外來之糧可以接濟遇有缺乏即致辦理周章惟有開未盡之地利庶可補民之不敷查滇省水田旱田大率開墾無餘而山麓河濱曠土尚有第勸墾雖有成規邊民獨多畏阻查滇省前於乾隆七年內題准兵部議覆凡山頭地角坡側旱壩可以墾種在三畝以上者照旱田十年起科之例以下則陞科若係砂石礮确不成片段更易無定或雖成片段不能引水灌溉者永免陞科至水濱河尾人力可以挑培或田稍成片段在二畝以上者照水田六年起科之例以下則陞科如不成片段零星地土不能定其有收者亦准其永免陞科等因在當年定議原屬從寬惟是山頭地角坡側旱壩究非平原沃壤可比水濱河尾挑挖成田亦必多費工本其中之成片段不成片段應陞科與不應陞科雖有一定章程仍須在人區別此等零星地畝遇報墾時地方官因有分別陞免之例必須嚴查或吏胥從中需索不免滋累且有司之能勤民事者親行踏勘細為分別則陞科與不應陞科尚得公平倘寄耳目於鄉保或即親勘剖斷未能允當則民吏報墾報陞既多周折迨墾後恐難保有收倘無收又恐難以告免農民未受墾荒之益先貽賠賦之虞此所以畏縮

不前報墾者寥寥無幾臣伏思 皇上念切民依凡有
惠濟蒼生之事雖費百萬帑金尚所不惜今萬里邊氓時
在 聖心軫念之中此些微山麓水涯地土科糧納賦
本屬無幾可否仰邀 聖恩特降諭旨將滇省水田旱
田仍照舊例陞科外其山頭地角坡側旱壩水濱河尾零
星地土聽民開墾不必從中區別概免陞科伊等無所畏
難自必踴躍趨事竭力開墾再查乾隆二年四月內奉

上諭雲南跬步皆山不通舟楫田號雷鳴民無積蓄一
遇荒歉米價騰貴凡係水利有關民食者皆當及時興修
不時疏濬總期有備無患須要因地制宜事可謀成斷不
應惜費欽此欽遵在案現今凡舊有水利處所地方官非
不按時興修其餘有可以開築渠壩引灌田畝之處農民
每因無力開修因循未辦如欲請項辦理必須專摺奏請

地方官因事屬零星動關入 告未免慎重遲回小民
亦因此畏難不敢具呈是以興修水利之處甚少應請嗣
後凡有可以開築河渠開壩灌溉農田者如民力不繼聽
其具呈地方官親勘明確詳請借項興修統於年底造冊
彙 題定限三年還項至農民內有開曠之田苦於無力
開墾者並造冊彙 題俟開墾成田之後亦分作三年還
項如此則民有鼓舞之心野無閒曠之土且水利日興後
可化瘠為腴生者既衆而民食可足矣臣為邊省產糧不
多急宜盡地利以裕民食起見謹恭摺具 奏伏乞
聖明睿鑒施行

請除派買倉穀之弊疏 乾隆三十一年良 卿
貴州布政司臣良卿謹 奏為請除派買倉穀之弊以杜
擾累事竊查直省設立常平倉穀春糶秋補接濟民食有

備無患法至善也而定例責成州縣等官平價採買運倉不許轉派里遞違者定有議處之條乾隆二十九年又經兩江總督尹繼善奏奉 俞允通飭各省嚴行派買復勒石永禁蓋以州縣採買倉糧一經按田強派未必全照市價給發而書役家人又復從中扣剋百弊叢生閭閻滋擾是以特嚴其禁黔省額貯常平倉米八十七萬七千石每年借糶兼行法良意美惟買補還倉之時酌定村莊大小買穀多寡派分里遞交納係原任撫臣張廣泗題明於前復經撫臣圖爾炳阿奏明於後相沿為例在撫臣等具奏之際立言皆以黔中跬步皆山不通舟楫民苗背負肩挑多止數斗難供採買不得不向糧戶給價承辦其議近是而擾累之弊由之漸啟臣請申明其故州縣月報米穀價值督撫大吏確核入告以上慰 聖天子念切民依

之意原無不實州縣按照時價採買例不許出此範圍在小民零星運送飯食脚費均無所出核之市價已有虧折况黔省地瘠山多烟戶疇零名曰糧戶實鮮蓋藏自派買之例一定不問貧富不計遠近不論民苗按田計畝升斗均攤追呼之擾幾同正賦兼之奸胥按戶派交易啟偏枯里保領銀轉發難免扣剋此又弊端之莫可窮詰者也上年天柱縣知縣徐鴻玠借端多買兼且漁利折收曾經參革即派買之明證也夫苗性易惑而多貪治此巖疆重地務在馴順而鎮靜之奈何以惠民之舉而開擾累之端殊非仰體我 皇上愛惜民苗寧謐邊疆之至意臣伏思黔省荷蒙 聖主格外天恩當青黃不接之時許令地方官詳請出借食穀接濟貧民秋成交納還倉無論年歲豐歉一照廣東福建之例概免加息 曠典昭垂民苗均

需補助倉糧亦免陳積原無需乎平糶之舉應請嗣後黔省倉穀每年分別歲收之豐嗇酌定出借之多寡不必拘泥存七之數按時借給秋收還倉倘有征收不前及冒濫滋弊者分別叅追仍責成該道府不時查察如該處市有餘米不准輕易詳糶如果市值較秋收貴至三成以上地方情形必須糶濟酌照該處可能採買之數詳明出糶秋成自行平價買補一切派發里遞承辦之令永行禁革如此則出借寬裕民有餘粟而市價自平糶易既少而補倉較易派買永除雖有不肖官吏亦無以藉端滋擾臣抵任黔藩已逾半載體訪輿情深知疾苦似應酌籌變通以清因循銅弊謹敢愷切敷陳是否可行伏乞 皇上聖鑒

陳畿輔河道疏乾隆三十二年

陳宏謀

協辦大學士吏部尚書臣陳宏謀謹 奏為遵 旨陳

明事畿輔地方南北兩運河及西南諸淀泊千流萬派之水均於天津歸海最關運道民生屢蒙 皇上大發帑

金築堤濬河多方修防又 特遣大臣會同督臣查勘

設法經理年來運道通利民獲寧居我 皇上治益求

治安愈求安猶復 親臨河淀巡視海口務求善後之

良圖以收經久之實效 臣昔任天津巡道曾司河務謹就

見聞所及叙述畧節是否可採仰祈 睿鑒

一道運一河原就高地開挖載水北流以資輓運所以河身較高而城鎮田廬皆處其下且河流灣曲易致頂衝全仗兩堤夾束危險堪虞乾隆元年河臣顧琮條奏築月堤放淤奉 旨俞允始而人情驚駭畏難不行迨乾隆三年遵議將舊有月堤加幫堅厚試行數處業經淤平自此三四五年接續放淤成功者約三十餘處極險之工均已

淤為平地計全河兩岸之堤可以放淤者尚有七八十處似宜接續辦理舊有月堤者可以加幫放淤舊無月堤者新築月堤亦可放淤放淤一段即可保一段之平穩其放淤祇須將月堤加築堅實預備料物人夫於河水漲滿時將其形勢入渾出清操縱在我並不涉險不出旬日即可淤平淤平之後永無築堤之費搶護之勞矣

一放淤成功之後河岸有坑缺滲漏之處皆已填滿堅實窄堤變為寬岸河水亦少衝射亟須於堤之沿邊離河甚遠之處加築小堤約高寬三四尺即作遙堤運河水出槽岸寬水緩泥沉於岸水仍歸河不至成險此外凡河岸本屬寬厚不必放淤者亦於堤之沿邊離河甚遠之處加築小堤與淤平之堤相接不令稍留空缺則全河之堤岸既寬復有綿亘遙堤以為外衛縱河水異漲出槽水勢平緩及堤而止亦不至於衝決矣

一運河河身原不寬廣每遇汎漲河水出槽盈堤拍岸難於防堵雍正年間怡賢親王大學士臣朱軾奉 旨興修水利於滄州之捷地汎青縣之興濟汎挖減河二道洩水東流建有石閘崙為減運河之異漲保固隄岸自此以後運河免於潰決在運河已受減河之益而兩減河屢有潰決總緣減河河岸甚窄兩堤夾束堤係土所築未用夯礮自開至海百有餘里其水雖云歸海而近海之區層層窪泊河水至此四散積淤不能一直歸海該管官以為水已入海而其實離海尚遠現有積淤形迹查歸海水口在於岐口距此尚有十餘里宜將近海窪泊逐一挑濬通聯俾減河之水直達岐口入海庶不至於壅積至於河身淺窄隄岸單薄若挑濬兩河幫築四堤須費十餘萬金查兩

減河左近歷係窪下荒鹹之地即未開減河以前田地常在水中今費十餘萬帑金以保此不毛之地得不償失國計民生兩無裨益惟請將提地減河之北堤興濟減河之南堤擇其地最窪下者開壩築堰將渾水引於荒鹹坑窪之地既已分洩減河洶湧之勢又可將不毛之地受淤積肥一俟運河水落歸槽不須分減之時即下板閉閘斷流減河之水可以及早消落計期不過八月中涸出之地正可種麥不至如向日徒受清水之浸泡而無益於種植所謂棄地於水實則藉水以肥地現有低窪之彭淀窪等處連年河溢受淤已成膏腴其明驗也難者或謂渾水雖有益於鹹地不免淹及村莊臣昔年住宿此地見一帶村莊未受水淹其村莊皆坐落於高阜之地雖驟長盈尺之水不至淹及民居況今入海之尾閘既已挑通數日之間清

水歸海消落甚速並無傷於屋舍也如此則兩減河不須挑河築堤附近村民既無減河之害兼受減河之利運河之水仍可分洩矣

一運河之東如吳橋東光南皮鹽山滄州等六州縣之積水西則阻於河堤東則阻於老黃河之高岸舊有王莽河沙河漫河皆已淤成平地以致此六州縣水無去路靈雨數日即受災傷乾隆五年前督臣孫嘉淦從吳橋縣境內起新開宣惠河自西南而東北由滄州之石碑河以達於海此為運河東岸地方洩水之經流繼因石碑一河已受衆水之歸懼難並納宣惠河之水改由鹽山之燕子窪經劉公渠東趨於海豐縣境內之老黃河歸海今聞中間有南皮境內之金沙岡土埂地勢漸高宣惠河之水至此不能東下常至漫溢地方不受宣惠河之利翻受宣惠河之

害皆由河未通流不能直達於海之故為今之計可否由石碑河直趨東北將中間窪泊疏濬通聯直歸於歧口入海或將金沙岡土堦大加挑挖成河東趨於海豐縣之黃河歸海何者為宜必須通體相度逐段測量擇其通順者動帑挑濬務成寬深之河凡附近溝窪積水聽民開溝引入此河則六州縣數百里之積水皆有宣洩不致前功盡棄矣所挑之河務須自首至尾漸次寬深以成迅流東趨之勢此等平地洩水之河祇宜展寬挑深不宜築堤轉貽潰決之患

一運河西岸窪泊相聯總名曰淀池京南十餘縣之水匯集於此加之北運河自北而來南運河自南而至均於天津會流入海夏秋汎發海口一時宣洩不及仗有此淀稍為停滯以次歸海不致為患是為畿輔蓄水之大水櫃有

關直省水利不小祇因永定河子牙河係渾水均穿淀歸海渾水入淀即淤以致淀池處處淤填不能如舊時之寬廣恨不能展之使寬不宜再淤使漸淺窄查子牙一河上承滹沱滹陽二河之水獻縣以上原無堤岸可以聽其游行自獻縣以下築堤捍衛幸兩堤離河最遠河岸寬濶河灘受淤水落歸槽不甚渾濁而入淀日久尾閘王家口亦已受淤向有支河三道近已淤墊二道僅存一道將有尾閘阻塞之患是以乾隆三年由上游之楊家莊另開支河引渾水由蔡家窪東北而行經閘留二莊水口而入金家等窪層層受淤窪地獲淤肥之利清水達于老軍泊自老軍泊而下之金里河所歷窪泊現有河形將來遞層淤積正可次第挑河直抵天津之板橋同北運河以入海老軍泊以下既成另河老軍泊上游如交河青縣等屬舊河之

積水向苦無處宣洩就勢疏通可由老軍泊獨流當城北趨歸海於隔別清渾之中兼收疏濬積水之效其子牙正河入淀之王家口去臺頭之清水河約十里向為三家淀之淤嘴莊頭之淤嘴埂阻今將兩淤嘴挖去取直批河直接臺頭之清河另有去路縱有渾水漫入然新河清水多而渾水少清水強而渾水弱正可以清刷渾不至淤及淤淀如此則子牙正河支河皆可免於淤淀矣至於永定一河自蘆溝橋而下中間並無窪泊停蓄以堅厚之兩堤束浩瀚之渾流直趨於淀始從柳叉口入淀而勝芳一淀淤成平地繼由王慶沱入淀而三角淀又已淤平乾隆三年因各處皆已淤高惟沙家淀最窪遂由鄭家樓范甕口穿堤而過漫衍於沙家淀仍由魚壩口歸淀均此淀也不淤於彼則淤於此多淤一尺即少一尺容水之地年來幸無

河決之患淀池淤塞似非經久之計但永定河河身綿長氣魄甚大水更渾濁作何分別清渾入海不致淤淀之處臣向未經管未曾籌及不敢妄議以上情形皆臣當年往來親歷籌及但距今多年連年修治或有今昔不同之處恭遇 聖駕親臨河淀千載一時迎邀 睿裁指示交督臣方觀承詳勘興修河防水利永資利賴 請停秋審提犯疏乾隆三十三年 阿思哈 河南巡撫臣阿思哈謹 奏為請停秋審提犯之例以崇實政仰祈 睿裁事竊照斬絞監候重犯每年例應秋審提犯至省督撫會同司道等官當堂鞠訊分別情實緩決可矜三項會疏具 題復經九卿科道將各省招冊細加察審覆奏請 旨定奪原例必秋審三次仍擬緩決始免解勘迨乾隆二十五年福建臬司史奕昂條奏減去

一次定為秋審二次後免解。國家欽恤民命典至重也。臣歷任各省屢預秋錄見應審各犯到案別無可吐之供。一再詰問惟有俯首認罪從無翻異。即溯之歷來各省秋審鳴冤平反之事本不常有。其情實緩決可矜三項則督撫與臬司未審之前察核案情往復詳議早經商定。尤不待臨審始決。是秋審一事直為犯人過堂之地。不特公事毫無實際。抑且長途遞解頗有不虞。伏查州縣相隔省城。程途遠近不一。往返一二十里。每當秋審屆期。解犯絡繹道路。雖有兵役押護鎖鑰緊嚴。而水陸舟車孤村野店難保其不乘間脫逃。更有強悍之徒自知必死罪無可加逞其桀驁之氣。凌轢路人搶奪食物。均所時有。而沿途州縣逐起護解尤屬紛繁。每犯一名須役二名兵二名。前起方去。後起又來。如兵役無多。差使頻仍之處。不得不催倩代

替。或致疎虞。恐亦不免。臣思斬絞重犯由州縣府回而至。巡撫層層究審。若非情真罪當。安敢輕率具題。迨奉大旨監候之後。該犯服辜待斃。無所希冀。是以連次秋審率不能自解。一詞。臣愚以為與其率循故套。審犯而無所異。同不若細心推求。審招而得其權量。即如刑部皆係據招察定。何嘗取問犯供。而在外秋審亦並不藉有犯供始行定擬。請將直省秋審停其提犯。每年止令各該州縣將犯由造具招冊。由府司逐一加勘。分定情實。緩決可矜三項。申送督撫。其在省之道府廳縣亦各發一冊。先行細核。屆期會集公所。照依京師朝審之例。用書吏一名在旁。將招冊逐案唱讀。與審各官虛衷體察。如有意見隨時講論。俟眾議會同始行判定。情實緩決可矜三項歸于至當。不易然後繕本具題。以副。皇上明罰勅法之。聖

懷如此辦理較之提犯到案並無裨益者似為愈昭慎重
且免長途疎擾之患而於循名責實之道庶幾相副矣
請建太學壁池疏乾隆三十三年曹學閔
河南道監察御史臣曹學閔謹奏為請增建太學壁池
以重典制事臣竊聞三代所尚者學也而辟廡之制莫著
於詩禮詩曰錫京辟廡又曰於樂辟廡又曰思樂泮水王
制天子曰辟廡諸侯曰頴宮臣謹按白虎通云頴宮半者
象璜也獨南面禮儀之方有水耳辟者璧也圍以法天外
圍內方明德當圍行當方此其義其制也欽惟我新皇
上建中和之極總制作之成其國丘方澤並則古
昔以備制度明天察地曠世未覩而辟廡之制尚仍前代
之舊闕然未舉意者有待於聖人次第舉行乃臻大
備乎且今直省府州縣衛所在學宮並有泮池而國學獨

無圍橋之制非所以答四方觀聽也臣愚以為方今文德
武功告成於學未有倫比皇上數舉臨廡之禮而有
詔重修先師孔子之廟甚盛典也宜以此時
勅下禮部詳考辟廡圍水之制以風示學宮明垂萬世不
誠懿燦隆茂之宏規也哉

請設新疆學校疏乾隆三十四年

溫福
永寧

伊犁將軍臣溫福辦事大臣臣永寧謹奏為新疆人文
日盛請設學校以廣皇仁以興教化事竊照烏魯木
齊一帶地方仰賴聖主德威遠播西域蕩平自乾隆
二十三年駐兵屯田二十六年招來內地戶民前來屯墾
二十九年遷移安西眷兵永遠駐防迄今已有種地民人
四千二百餘戶携眷兵丁三千六百餘戶生齒日漸繁盛
而兵丁子弟內資性聰慧堪以造就者甚多臣等於乾隆

三十二年 奏請在烏魯木齊特訥格爾昌吉等三城各設義學一所選擇師長教讀兼令學習騎射技藝在案自設義學以來兵民俱各踴躍令子弟入學讀書而延選教讀之人亦各盡心訓迪近日頗有成效現在讀書文章能文者固多而兼習騎射之武童人材弓馬可觀者亦復不乏查從前安西裁改廳衛設立官學案內經軍機大臣議准敦煌等三縣各設訓導一員各建文廟一所每縣歲科兩試准其進取文生四名歲試各准取武生四名在案今查烏魯木齊即迪化城設有同知一員所屬之特訥格爾即阜康城設有縣丞一員昌吉即寧邊城設有通判一員所屬之呼圖壁即景化城設有巡檢一員亦隸安西道所轄從前議設同知通判之初其設學取進文武諸生併應建文廟等事原應與安西府敦煌等縣一律辦理因其時

未安民戶而眷兵亦未遷徙來屯是以未經議及現今兵民增至七八千戶當此人文漸盛之際似應照依安西敦煌等縣畫一辦理請於迪化寧邊二廳每廳照敦煌等縣之例歲科兩試各取進文生四名歲試取進武生四名暫令兩廳管束俟取進諸生每廳約有百名之後另行請

旨設立訓導至於廩增各額敦煌等學係由衛學改設是以各設二缺以次幫補今兩廳係初設之學應俟生員考滿二十名然後照西安之例幫補出貢再查敦煌等縣相距肅州甚近是以各童赴肅州考棚聽候學臣考試今烏魯木齊距肅州往返六千餘里途路遙遠諸童赴試資斧維艱應請將迪化寧邊二廳諸童酌仿臺灣之例由廳道錄送 臣等衙門考試秉公取進將取進童生名次及前列生員試卷咨送陝甘學臣彙入歲科冊卷達部設遇不

能足額即遵照定例寧缺毋濫如蒙 聖恩俞允每廳各建文廟一所於本年秋成後乘兵丁閒暇之時臣等選擇地基酌派兵丁照依修建先農壇之例量給口糧興工修建每歲祭祀銀兩亦照敦煌等縣之例一體開銷在於本處備用銀內動支如此則新疆兵民子弟皆知上進有階攻讀者益加奮志騎射者更求嫻熟於地方似不無裨益也

皇清奏議卷五十七

皇清奏議卷五十八

陳保甲簡要之法疏乾隆三十四年歐陽永琦

廣東布政使臣歐陽永琦跪 奏為敬陳保甲簡要之法仰祈 睿鑒事竊惟立法必歸於實行法務得其要伏查乾隆二十二年欽奉 諭旨令將保甲如何設法編查及考覈責成之處著督撫各就地方情形詳悉定議經部彙核覆准通行遵照在案自定議以來各省有司非不循例奉行乃閭閻之間仍屬奸良莫辨即近日匪案之發覺由於保甲之舉首者甚少臣細加體察似行之尚未得其要領蓋保甲之設原所以稽察莠民並非欲以束縛良民如陝省巨匪馬得鰲之黨羽均係犯案之積賊臺匪黃教亦曾經犯罪福建之漳浦古田廣東之新興匪案各犯及凡犯私鑄私宰窩盜窩匪等案總屬游蕩無業之徒至

於四民之安分自守者原不必時加查點乃現今州縣辦理保甲惟知籠統編查不分良莠以致稽查不專且保正甲長畏與無賴為讐不敢舉首則雖日事編查終屬有名無實臣愚以為應請飭令各州縣將境內遣配安插之軍流徒犯及本邑為匪曾經枷杖之犯彙冊分駐嚴密稽查再訪不務生業游手好閑行踪詭秘之莠民陸續登記入冊地方官耳目最近聞見易周若隨時隨地遍加查察不難得其確實仍按照住址開單分發該處保正甲長收執出必稽其所往歸必根其所自一有為匪形跡許即密稟州縣訪察得實密差拿究審實之後明立檔案倘異日挾讐扳害自可查案伸雪則保正甲長不致畏累諱匿而舉首之法可行矣至該管道府因公巡歷所至吊冊考核並留存交代接續查辦奸匪自聞風斂跡其守分安業之良

民於既編戶口之後止於年終將增減遷徙添註如此酌歸簡要則保正甲長之心力既崇責成更切地方官若不切實奉行以致匪類乘機竊發即臨事查拿已屬功不掩過如毫無覺察又不能刻期就獲按照犯案輕重分別參處治罪以昭炯戒似於保甲之法可收實效矣

請挑濬東省河渠疏乾隆三十五年 富明安

山東巡撫臣富明安謹 奏為奏明挑濬河渠以弭水患事竊照地利農田皆闢民生本計理宜加意講求隨時修舉以冀仰副 皇上子惠元元之至意臣於去冬查勘運河之便見嘉祥縣之趙王河澹臺河蔡河鄒縣之白馬河俱逐段淤淺各河皆關運道民田隨經飭令各該縣插立標誌勸民逐加挑挖據報完工委驗如式又查濟南府屬之章邱鄒平長山新城等縣青州府屬之高苑博興樂

安等三縣向有水患臣於上年九月內巡查所至留心體察因章邱等七縣六百餘里中有小清河一道為各山泉衆湖泊之匯歸該河一幹兩支久經淤塞歷任撫臣屢飭籌辦河身橫跨數縣分隸兩府動多掣肘未及舉行臣於十一月間飭委候補知縣陳鷄等會同各地方官逐加履勘緣小清河自章邱長白山發源起東至新城高苑兩縣交界分北條為支脈溝又東至博興縣分南條為預備河其中條則仍為小清河河溝俱分宣入樂安之溜河歸海今中條之小清河消納七縣小河湖泊之水中多灘嘴淤腹阻滯河流其北條之支脈溝分小清上流水勢而尾閘八十餘里淤塞不通下壅必至上潰七縣民地在在堪虞其南條之預備河防小清下截頂衝于康熙年間開而未成有名無實後雖于乾隆五年在預備河之南接挑福民

河而地勢高亢年久漸淤不能分洩以致湖泊諸水散漫東趨樂安之草橋八窪一帶糧田數千餘頃常被水淹或已經豁免或僅收蒲葦之利此兩府七縣之受病情形也欲弭七縣之患應從下游之樂安始臣現擬於樂境之小清河挑挖灘嘴淤腹培高堤堰以防泛溢並將預備河舊形五十四里及支脈溝之對門圈左右八十餘里大加挑挖務使一幹兩支建瓴而下分洩入溜河歸海仍飭上游各縣將支脈溝及小清河上截一體挑通淤淺不特博興之夾河樂安之八窪等處數千頃可復膏腴即章邱鄒平長山新城高苑等縣附近湖泊之地涸出必多與民生大有裨益各縣民居咸知利病切己俱願出力與挑無須動帑但樂安工程較大應令上游各縣幫辦庶幾衆擎易舉臣與藩司尹嘉銓商酌轉飭各縣體詢輿情實俱踴躍請

於春融即興工辦理再各地方官俱有刑錢職守恐未能專司其事查有原任澤縣知縣許承蒼原任益都縣知縣趙三槐均緣事革職交代已清例應回籍臣查該二員在東年久年力俱壯歷辦水利工程向有成效因委令協同候補知縣陳鷓查勘各河道俱有條理合無仰懇 聖恩俯准將許承蒼趙三槐留於東省令其自備資斧幫同各地方官辦理小清河支幹各河事務俾贖前愆如果實心出力容臣於事竣另行奏 聞請 旨理合一併陳明臣謹恭摺具 奏

陳社倉事宜疏乾隆三十五年

李 湖

護理江蘇巡撫臣李湖謹 奏為奏明查辦社倉事宜斟酌調劑以杜流弊而收實效事竊照社倉分貯各鄉收掌出納責之社長春借秋還接濟民用於農民裨益最切江

蘇省社倉自乾隆二十四年經撫臣陳宏謀徹底清查防其流弊酌定成規五條具摺陳奏奉到 硃批覽奏俱悉實力妥為之欽此臣欽遵轉行各屬遵照辦理在案臣於本年五月內到蘇州藩司之任即經查核蘇州松江常州鎮江太倉五廳州屬各社倉應貯之額雖有二十六萬九千餘石從嚴核實清釐內中存價未買者有六萬數千石社長侵虧者六百餘石歷年出借在民者十六萬三千餘石稽其實存在倉僅四萬餘石臣於秋成之前嚴飭府州督率州縣逐社清查應著追者嚴追應買補者買補應徵還者徵還復責成巡道嚴行督催稽查務令悉歸實儲臣奉 命護理巡撫印務查核江寧藩司所轄江寧淮安揚州徐州海州通州六府縣屬社倉積貯額共一十萬六千九百餘石折價未買者五千六百餘石社長侵虧者

四百四十餘石歷年出借未還者一萬三千八百餘石稽其實存在倉亦止六萬八百餘石臣一體嚴飭府州縣乘此秋收之後上緊買補徵還並嚴追社長侵虧之項近據八府三州陸續具報現俱實力催還買補按額實儲應於歲底委員盤查以驗其虧短外臣合計江蘇通省額共社穀三十七萬六千餘石果能處處皆歸實儲春秋斂散以有億萬貧農受益原非淺鮮乃臣於察核各屬社倉虧短情形深悉社倉之裨益固多而辦理社倉之流弊正復不少因為之推求其故自前撫臣二十四年奏定成規後奉行之初原屬無弊無如江蘇民情巧偽事熟弊生而地方有司又視社倉為無關考成漠不經意行之日久胥役鄉保與社正副聯為一氣就除弊之科條轉而為滋弊之塗境即如點充社長原定成規以十年更換嗣經條奏改為

三年一換前撫臣陳宏謀因社長不無賠累請改為一年一次輪當其意原為社長久充致成虧欠之弊詎近日社長視同傳舍寅接卯替彼此故避虛交互相蒙蔽遂至春借秋還皆成虛套且一社之中公正堪充社長者不可多得一年一換需人過多惟憑鄉保舉報按戶輪當遂多任非其人弊難枚舉更查社倉穀石原定規條耑責社長收掌出納不令地方官司其出入蓋恐官吏經手易啟挪掩之弊且一經官管便與常平倉無異即失社倉本意但春借秋還地方官竟不稽查比追社長徇情濫借與土棍強借不償之弊勢所必至臣就前撫臣陳宏謀原奏定五條內與現在江蘇省社倉實在情形悉心體察現在行之無弊應仍其舊者三條另繕清單恭呈御覽其有應酌量更改者二條有應增添者一條謹就現在社倉情形斟

酌調劑恭陳於前聖鑒
一社長年限宜酌更也社長一年一換歲歲需人不得不
責之鄉保開報恐其所舉非盡端謹成實之人濫借侵漁
既不能免即有一二小心謹飭者又或慎守管鑰顆粒不
放莫逾一年期滿交卸脫累亦屬無裨農民應請嗣後選
充社長永不許著落鄉保舉報務令該州縣在本社各村
莊內照例于不應試之殷實監生遴訪舉充司事三年出
納公平社穀無弊詳報道府給匾獎勵再令接管三年如
能始終如一據實通詳將該社長舉充鄉飲以示優眷六
年期滿另選充補設或辦理不善即行隨時更換不必定
以三年倘本社各村實無不應試之監生即舉誠實鄉民
充當亦不必拘泥成例
一州縣稽查之法宜更重其責成也社倉定例社長端司

出納官役不得掣肘但春借之期官不為之稽查核實則
柔懦社長土棍鄉保胥役皆得硬借重借秋斂之期官不
為之查比欠戶皆得拖延應請凡遇春借之期社長將應
在本社借穀之戶取具押領同正副簿稟送州縣核准示
期開倉出借該州縣接到稟報按照村莊門牌核明應借
之戶填入正副簿內其不應借者不准入簿借給即於次
日定期出示赴領至期分委佐雜或教職一員親赴看散
散畢封倉如開倉出借時有強梗之刁民該委員即帶交
印官究處至秋成後應行還穀時社長稟明州縣示期開
倉收納若按期交納全完州縣或親赴驗明封倉或委佐
雜教職赴驗封倉倘十月內不能全完社長將簿內欠戶
標明稟送州縣差傳欠戶比追是收掌出納仍責之社長
也地方官嚴其查核則強借拖欠之弊可除其州縣交代

孝五十一
驗報及歲底奏報一事宜仍照原定規條辦理
一苦累社長事宜嚴行禁革也近日江蘇各屬凡係鄉曲
謹愿之人無不畏避社長一役蓋緣經營出納不惟憲招
鄉里尤怨與頑戶之抗欠賠墊其最為苦累交代盤查按
月按季冊報摺報等事地方官以社穀掌于社長每遇造
冊結之事總惟社長是問奔走城鄉致多浮費加以胥役
之駁詰差使之傳催一充社長便無休息此等弊累亟應
嚴行禁革查社倉穀石每社俱定有正副簿籍出借時按
戶登明有無存穀數目一目了然及至秋成收還亦復登
簿一存州縣一存社長一社之數目燦然可稽即通縣之
數目較若列眉不但州縣造報月摺季冊可按籍而稽即
遇交代盤查冊結亦無難按簿查辦嗣後社長除春借秋
還赴官稟報及遇盤查到倉開驗外如仍有以造冊出結

等事苦累社長者或經告發或被訪出官則嚴參胥役立
拿重處則社長之重累盡除而責任亦專矣以上各事宜
臣因現在清查社倉悉其流弊設法剔除冀使惠民之實
政得垂永久不致因弊而廢法謹繕摺具奏

陳捕蝗事宜疏乾隆三十五年

竇光鼎

副都御史臣竇光鼎謹奏為據實陳議仰祈
睿鑒
事臣伏查乾隆二十五年前督臣方觀承有見於通州等
處捕蝗之失飭司道議設護田夫欲使官民兩便旗民一
體意誠善也而其立法有斷不可行者有可行而未能行
者臣謹條析陳之其議曰三家出夫一名十名設一夫頭
百夫立一牌頭每年二月為始七月底止令各村按日輪
流巡查臣謹按冊計之大興宛平二縣共應出夫七千五
六百名此數千人者果盡力巡查且歷半年之久勢將荒

廢本業不知衣食於何取給今各州縣捕蝗約用人夫二三千不等少者五六日多者十餘日酌給錢米民人猶以為艱若每縣之中令數千人枵腹原野積以半歲臣知其必不能矣且田各有主耕作之餘查察自便舍種植之戶而責之他人勞且無益若海濱河淀濶遠之區而與尋常村莊類設又恐推諉誤事此其不可一也又其議曰護田夫免其門差牌頭並免大差臣竊考之旗莊本無地方雜差可免民人又不能盡免冊造護田此夫也輪派雜差亦此夫也免差既屬空言巡查寧有實力而簿書查造胥吏或因緣為利此其不可二也且其議三家出夫一名計百戶之村出夫三十名五十戶之村止出夫十餘名以之巡查則病其多以之撲捕又病其少若撥一千名必合數十村遠者不能即至而本村近處反有餘人例派不及臣每

遇飛蝗停落日擊心惕諭令就近加撥夫始漸集若依三家為例則可捕之時人夫無幾比數十里裹糧而至而蝗之遠颺已過半矣此其不可三也且其議曰民勞病遠撥也又曰官費憲貴催也其名曰護田欲不傷田禾也今依其例出夫則近村之夫只有此數近者不足用必濟之以遠而民之勞如故遠者不及待必出於貴催而官之費依然且遠來當差人常不肯盡力而為遠地代捕又不甚惜田禾極力飭禁時猶不免是以旗民均以為病不願捕蝗此其不可四也至其議曰旗民一體設立護田夫查則輪查撥則均撥誠有合同井守望之義矣但其法既不可行而所謂護田夫者空名而已平日既不能輪查臨時又安能均撥且司道原議曰旗人不統於地方官恐呼應不靈奏明通行庶知凜遵是旗莊之難齊前司道早議及之矣

而前督臣未經具奏者不能自信故也姑允衆請嘗試之云耳既而知其果不可行而猶以其名而存之者以護田之說臨時便于派撥也顧飛蝗停落之時愚民無識率以喊逐為易撲捕為難亦不獨旗佃為然而民人可以法繩旗佃難於強使况旗莊主人未嘗與其議既無由申明約束而地方官向莊頭取夫每稱借用不出皆可自由其不畫一無怪也此臣所謂可行而未能行者也臣以捕蝗察知利病竊以為去其法之煩擾而獨取旗民一體捕蝗一節并申明就近村莊多集人夫著為功令則有護田之利而無其害此臣前奏本意也業蒙聖旨俞允則其未能行者今已行矣而督臣乃舉二十五年之議以為定例則臣所謂四不可行者誠恐嗣後復舉以為例而奉行轉滋貽誤臣不揣愚昧謹就二十五年原議酌歸簡

易並將查捕所見情形酌為捕蝗事宜數條附列於後
一捕蝗人夫不必預設名數致滋煩擾但查清保甲冊造村莊戶口臨時按照酌撥應用旗莊則理事同知查造清冊交州縣存查
一捕蝗必用本村近地之人方得實用嗣後凡本村及毗連村莊在五里以內者比戶出夫計口多寡不拘名數止酌留守望餽餉之人而已五里之外每戶酌出夫一名十里之外兩戶酌出夫一名十五里之外仍照舊例三戶出夫一名均調輪替如村莊稠密之地則五里以外皆可少撥如村莊稀少則二十里內外亦可多用若城市閑人無戶名可稽者地方官臨時酌僱添用
一牌頭每縣不過數十名因而增之大村酌設二三四名不等中村酌設一名小村則二三村酌設一名免其雜差

俾領率查捕人夫

一各村田野令鄉地牌頭勸率各田戶自行巡查若海濱
 河淀濶遠之地則令各州縣自行酌設護田夫數名嵩司
 巡查向來以米易蝗子之例若蝗子一升給米三升則搜
 劓自力
 一凡蝗蝻生發鄉地一面報官牌頭即率本村居人齊集
 撲捕如本村人不敷用即糾集附近毗連村莊居人協捕
 如能即時撲滅地方官驗明約加賞賚如扶同隱匿一經
 查出即將田戶與牌頭鄉地一併治罪如近村人夫仍不
 敷用地方官酌撥漸遠村莊輪替協捕如蟲孽散布連延
 數村則各村之人在本村撲捕各於附近村莊撥夫協濟
 以次及遠仍照例會同營汛兵丁督以幹員妥役則捕滅
 迅速而田禾亦不致損傷

一外村調撥之夫仍照舊例每名日給米一倉升或大錢
 十五文其奮勇出力者酌加優賞如濶遠之地須調撥遠
 夫者加給米錢一倍

一捕蝗器具莫善於條拍其制以皮編直條為之或以麻
 繩代皮亦可束省人謂之掛打子最為應手順天各屬向
 無此物宜飭發式樣使預製于平日以便應用其次則舊
 鞋底各屬多用之然常不齊全宜預行通飭若仍有以木
 棍小枝等物塞責者即將鄉地牌頭一併究處

一蝻子利用開溝圍逼加土掩埋蝗翅初出未能飛亦可
 圍捕至長成之後則宜橫排人夫尾隨追捕若乘黎明露
 濡穢除尤易若在禾稼之地則宜隨壠趕捕不得合圍喊
 逼致令驚起且易損田禾
 一收買飛蝗之法向例皆用之總緣烏合之眾非得錢不

肯出力耳其實撥拾收貯給價往返掩埋皆費工夫故用夫多而收效較遲惟施之老幼婦女及搜捕零星之時則善矣若本村近隣力能護田以精壯之人持應手之器當蝗勢厚集直前追捕較之收買一人可以當數人之用故用夫少而成功多且蝗爛地面長發苗麥甚于糞壤也

請濬漳葭港老河疏乾隆三十六年

裴宗錫

安徽巡撫臣裴宗錫謹奏為請濬省城通江之河道以衛漕運以濟民生仰祈聖訓事竊照安慶省城濱臨大江為吳楚出入之門戶沿江均屬高阜難以艤舟惟西門外舊有漳葭港河一道土名老河上通潛山太湖望江三縣下達大江實漕艘商船往來停泊之要區並該三縣衆流出納之總匯後因江潮倒灌山水漲發遂致港口流沙淤積日久漸成平陸前撫臣張楷任內曾於上游另開

新河一道奈地高水急重載逆流而上仍難進口凡有往來船隻不得不在江邊灣泊設遇暴風猝起四面均無捍蔽波濤衝擊每有覆溺之虞是以安慶雖為上江省會平時商賈船隻因畏江岸難泊往往過而不留每年漕船兌糧後沿江灣泊亦多不便今若將老河開濬深通不但本省及江廣漕船均有避風棲泊之所客商過往重船亦有內河收纜可望百貨聚集民業有資且潛山太湖望江三縣田疇旱則引江潮以資灌溉澇則洩山水以防泛溢更於農田有益從前歷任撫臣屢經議欲興舉祇因公費無出未得辦理臣往察勘緣老河故道東西延邇有六百一十餘丈新河在其上游南北僅長一百零數丈較諸老河不及十分之二河身既短地勢復高水溜湍急自不若老河之身長水緩得以從容進口安穩泊船也臣再三相度

應將新築壩堵閉使漳葭港全河之水仍歸老河故道庶
往來重船易於進口停泊現在委員勘估挑濬并築壩一
道共約需銀二萬兩且慮河流淤積每年必須有歲修經
費庶可長遠深通一勞永逸伏查安省捐修城工項下尚
有存剩銀四萬七千九百兩零經前撫臣託庸奏明留為
本省修城之用今通省城工告竣為時未久即偶有坍塌
俱經地方官隨時修整所存城工銀兩現無需用之處似
可暫為通融臣仰懇 皇上天恩即於城工存剩項內
借動銀二萬兩為挑濬漳葭港河之用如蒙 俞允即
於三月內動工興挑倘彼時江潮漲發不能即辦一面預
備工料俟秋後水落即行挑築工竣核實奏 聞再查
乾隆三十四年大學士臣尹繼善於停止營運生息案內
奏明各省如堤岸橋梁歲修等項雖亦係領本滋生款項

而以該地營運之銀即為該地公事之用原與收取息銀
賞卹兵丁者不同嗣後改為籌備某事公用字樣通行遵
照在案所有城工存剩銀四萬七千九百兩零內除借動
二萬兩仍存銀二萬七千兩 臣請將此項銀兩分給安慶
徽州寧國三府殷實典商營運約以一分起息計每年可
得息銀三千二百餘兩約以十年為率掣回原本以息銀
二萬兩歸還原借款項其餘息銀除歲修使用外餘銀仍
給典商營運取息以作歲修經費即為籌備濬河公用字
樣以符定例如此設法籌辦則此河永無淤墊而糧艘商
民均沾利濟夫以修城之餘資籌濬河之經費以公濟公
於國計民生似屬兩有裨益矣

皇清奏議卷五十九

陳新疆情形疏 乾隆三十七年

文綬

陝甘總督臣文綬跪 奏為敬陳關外情形仰祈 聖
鑒事竊 臣於乾隆三十六年七月二十四日欽奉 上
諭前赴齊爾等處 賞賚投誠之土爾扈特人等 臣於

八月十五日出嘉峪關由安西至哈密九月二十六日過
南山口由東達巴松樹塘奎蘇石人子而抵巴里坤時當
秋成之候城州禾稼盈疇天時地利人和大有等渠屯田
甚廣頗為豐美城廂內外烟戶鋪面比節而居商賈畢集
晉民尤多 臣留心諮訪其高賈中之有資本者已多認地
開墾其藝業傭工窮民因乏生理資本未經呈墾而該處
地廣糧賤謀生甚易故各處民人相率而來日益輳集又
西行自蘇吉助巴爾烏圖水噶順溝大石頭而抵三泉子

計程約六百里地多戈壁可墾之地甚少因係往西大路
經前督臣明山奏明派兵酌建店房以便商賈往來棲宿
現在辦理行旅稱便又西行即木壘河東西吉爾瑪泰奇
臺東西格根吉布庫更格爾等處南面一帶山如屏障自
春入夏積雪消融近山各處渠水充足向設八屯自乾隆
三十二三四五等年招民墾出良田三萬四千餘畝又木
壘一帶英格布喇及東中西泉等處商民種地數千餘畝
又奇臺東格根吉布庫官兵屯田萬有餘畝內地商賈墾
業民人俱前往趁食聚集不少而該地屯田民人生齒繁
衍扶老携幼景象恬熙此巴里坤所屬地方戶民蕃庶情
形也又西行即吉木薩地方隸於烏魯木齊所屬三臺紫
泥泉子特訥格爾而抵烏魯木齊天氣和暖地土肥美營
屯地畝日以開闢兵民衆多商賈輻輳比之巴里坤城內

更為殷繁又西行即昌吉瑚圖壁瑪那斯等處其地肥水
饒商賈衆多幾與烏魯木齊相似約計烏魯木齊所屬連
年在外招募戶民及內地送往戶民共墾有營屯田地三
十餘萬畝頗為殷足每年往彼貿易之民日益衆多是以
烏魯木齊特訥格爾等處商民陳善魁等一百七十戶以
仰沐 天恩屢獲豐收比戶家給人足以成樂土請撥
眷來屯等情業經烏魯木齊大臣巴彥弼等奏明於上冬
搬移在案臣查其所搬父兄弟計共八百餘口此外在
彼樂業墾田及傭工藝業之人連年生聚日益衆多即在
彼為民遣犯亦無不各安耕墾積蓄成家此烏魯木齊所
屬地方饒裕情形也臣往來新疆時遇負擔之民出外趁
工傭食詢之據稱新疆地廣糧賤傭工一月可得銀一二
兩積蓄稍多自請移家誠如 聖諭關外屯政日豐所

在皆成樂土小民知利之所在無不爭先往赴久而相安成習邀朋携侶熙攘往來各自適其謀生之樂 聖主籌憲邊氓生計燭照無遺洵有如臣途次往來所見者臣於彼時體察地利諮詢民情知該處水饒地肥洵屬無窮樂利惟是屯田雖已廣闢而餘地猶未盡墾泉源雖已疏濬而溝洫猶未盡開欲期地無棄壤民無遺利必須於內外各處並行招募除內地貧民照前勸諭令其自行前往其在外之民目擊屯田豐美或因資本不敷或因人地生疎未免遷延觀望今若不拘人數多寡一經具呈即便隨時指地給墾借給牛具籽種俾無守候之勞自更樂於從事將見生聚益繁而地利大興營屯增廣而兵威愈壯自可酌添郡縣以廣久遠之規臣以身履其地目擊情形謹謬抒管見敬為我 皇上陳之

一新疆各屯商賈傭工藝業民人甚多應請就近招徠墾種也查巴里坤木壘奇臺吉木薩特訥格爾烏魯木齊昌吉圖瑪那斯一帶年來商賈貿易傭工藝業民人日多一日富者可以出資雇募工人儘力承墾即為己業貧者照例每戶給地三十畝接濟口糧並給農具籽種酌借房馬銀兩俾得安心力田則目前既可資以餬口而將來併得藉以成家誠如 聖諭彼亦何憚而不為應請飭令各該道廳將在外商賈富戶及無業貧民並戶民子弟之成立者隨時勸導因地招徠則就近招民既免遠道解送之勞並節虛糜帑項而在外流寓貿遷之人亦得安居樂業悉成土著其呈墾地畝照新疆戶民成例六年陞科每畝納細糧八升其借給口糧房馬價銀亦照例俟生計就緒後分年完項則民力既紓地利益廣矣

一新疆可耕地畝應指明地名廣為曉示以便農民往墾也查新疆二萬餘里地方遼濶何處有可墾之地必須指明地名開載道里以便前往臣前於上年署理督篆任內咨查新疆嗣准烏魯木齊大臣巴彥弼明山等咨覆瑪那斯城南一帶地肥水足有地二萬餘畝瑚圖壁城西北二十餘里約計有可墾地六十餘畝可敷六百戶耕種又據巴里坤總兵存泰安西道錢鑿詳稱巴里坤城外及西大墩大泉井東西石人子沙山子奎蘇共有可墾地五千九百餘畝可安民一百餘戶等語應請飭令內外各地方官廣行曉諭令無業之民自行前往呈墾照例借給屋價牛具籽種以廣地利此外續有查出水泉地畝再令照前移明內外曉示如此則民知趨向呈墾亦為便易矣

一嘉峪關本屬內地應請每日晨開酉閉以便農民商賈

前往關外廣闢田疇也查嘉峪關舊例每日將關門常閉惟是有人出關驗照方得放行今仰賴 聖主洪福嘉峪關外拓地二萬餘里安西以外處處設官安營星羅棋布無異內地矣乃關吏循照舊例將關口仍行常閉凡有經過者俱查驗年貌詢明姓名註冊方得開關放行不免守候稽延之累在關外立業墾田者既願招致親朋內地無田可種者亦頗相携出門乃皆阻於一關未免趨趨不前應請飭令該地方文武各官嗣後將嘉峪關每日晨開酉閉進關者仍行盤詰出關者聽其前往不得阻遏農民將見携朋呼侶自相招引民戶日增矣

一烏魯木齊大路數處應請修治寬濶也查烏魯木齊城南二百里地名七達巴有山梁七八處石壁夾峙甚狹行車頗艱幸每處應鑿石嘴不過一二丈統計七八處應修

工程不過十數丈若令石匠燒鑿石嘴所費無多而往來農民及一切差使均為有益應請飭令該地方文武官員派撥兵役帶同石匠關給口糧酌加修治則大路既得一律寬濶而於行旅亦為有益矣

一安西曠地現在就近上緊招墾以廣地利也查安西府屬之玉門淵泉敦煌三縣雖土性鹹鬆而可墾之地尚多向藉渠水灌溉前因渠水多寡不定民間將昔年試墾之田漸次拋荒臣于上年欽奉 上諭以安西一帶有向經墾之田年來復有聽其曠廢等因欽此臣當即諄切飭查並令廣為招墾近據安西府知府巴彥岱詳稱今將民間溝渠疏濬流通現在渠水暢流除已澆種地畝外尚有餘水所有從前試種未成及附近可墾之地約計所餘之水淵泉玉門敦煌三縣共可添墾田五千餘畝現在督率

各屬就近招徠無業貧民乘時開墾試種等情臣已飭令上緊招墾以廣地利如此則曠土次第開墾民食漸加充裕矣

以上各條臣謹就地方情形謬擬陳奏期以收地利而裕民食足邊儲而厚屯防用廣萬年久遠之計以仰副我皇上愛養黎元之至意

籌新疆倉儲疏 乾隆三十七年

文 綬

陝甘總督臣文綬跪 奏為請設常平倉儲以實邊屯以足兵食仰祈 聖鑒事竊照烏魯木齊內倚天山外撫遠人延袤廣濶營制星羅洵諸路之中權實重門之保障其所屬吉木薩特訥格爾昌吉瑪那斯等處屯田甚多商民輳集又迤東之巴里坤南路崇山峻嶺東峙德勝雄關地勢崢嶸屹然重鎮其所屬奇臺木壘等處水土肥美營

屯相望又東南為哈密泉甘水肥宜於稼穡年來田園廣
闢商民衆多且地處衝途為諸路之要津新疆之鎖鑰臣
查以上各處俱經設有重兵而幅幘遼濶正應添營增壘
以壯聲威近蒙我 皇上睿憲周詳於烏魯木齊巴里
坤二處分駐滿兵五千名從此西接伊犁外控遐方南俯
回部東拱甘涼聲勢聯絡軍威遠震洵萬年久遠之鴻規
也伏查重兵分駐之區自宜多設 天庾以廣儲蓄乃
皆未立常平似應亟為籌備又安西府肅州二屬毗連哈
密田多渠廣向藉山雪消融引灌連年屢獲豐收該屬地
勢平行為四通八達之區轉輸甚易亦宜積貯充盈以便
隨時撥運則東可供內地之缺乏西可備邊屯之接濟於
民食兵糈均為有益臣查新疆各處仰蒙 聖澤涵濡
天和地潤物產豐美已成樂土惟每當豐收之歲未免有

穀賤傷農之慮今各該處商賈雲集輪蹄絡繹若准令各
省商賈士民報捐監糧洵足以實邊屯而足兵食裕商賈
而濟農民合無仰懇 皇上天恩俯准於烏魯木齊巴
里坤哈密三處各額收監糧十萬石吉木薩奇臺木壘昌
吉等處各額收監糧五萬石安西肅州二府州及所屬各
縣各額收監糧二十萬石以上安西肅州二處每生俊輸
納糧數色樣悉照乾隆二十二年七月前督臣吳達善奏
定安西肅州糧數色樣報捐其哈密及以西各處悉照安
西之例報捐至糧色悉隨本地所產交納如此則自肅州
以至昌吉沿邊萬有餘里重兵駐劄之區倉儲處處充盈
遠近皆為有備不特支食有資兼得轉輸便易且商賈人
等爭相購糴農民咸知粟貴益皆盡力耕耘誠如 上
諭新疆屯政日豐既可以實邊儲而貧民亦得生養繁息

聖主籌憲邊屯民食實為一舉兩得將見阡陌廣開
地無遺利產粟日多邊儲愈足兵民商賈共沐
於億萬斯年矣 皇仁

陳鹽井事宜疏乾隆三十七年

李湖

雲南巡撫臣李湖跪 奏為敬陳鹽井事宜仰祈 聖
鑒事竊查滇省所產大小鹽井一十五處額煎正餘平秤
鹽三千六百一十三萬餘觔分撥各屬及各省店行銷從
前立法稽查尚屬調劑得宜即盈絀難齊隨時補救並無
墮誤之虞自乾隆三十一年以後總理分管各員調委不
時正署屢易官無固志人懷倖心遂有墮煎墮運墮銷之
鹽各積至數百萬觔之多其中雖不無澆淡薪艱運腳繁
重辦理竭蹶情事而積年不加釐剔諸多懈弛以致撓和
昂價盜賣透私諸弊相緣而起加以通屬額鹽省店分銷

四分之一墮誤尤甚弊累更多臣蒞任以來詳查檔案體
察民情博採輿論與督臣暨司道等反復確商謹將現在
滇省鹽政應行清釐調劑各事縷晰條分敬為我 皇
上陳之

一請裁撤省店責成官運分銷以免墮積也查滇省迤西
各井鹽觔俱係州縣自赴領運設店售銷畫地行鹽責任
既專緝私自力額益不虞墮誤惟迤東一帶離井較遠向
運省城鹽道開設總店分立大鋪一百二十處輪班領鹽
轉賣於迤東二十一州縣小販分銷其行鹽各地方官全
無責成亦未定有額數立法之始因省會烟戶盈集鄉販
挑運柴米食物赴省順便帶鹽回銷可以節省運腳並利
其先課後鹽無煩徵解相沿既久漸滋流弊歷任鹽道不
免姑息因循憚於整頓迨至乾隆十八年釐定章程案內

將南寧霑益尋甸平彝宣威等五屬酌定額鹽支銷運脚責令官運行銷堵禦川私其餘嵩明等十六州縣仍聽民販自赴省鋪轉運既無定額又無常期鹽少則居奇射利者在大鋪鹽多則陳因墮積者在總店即販戶領鹽到手果否運回本地售銷有無昂價病民夾帶私鹽與販情弊鹽道既苦耳目難周各屬又無引照可驗官私莫辨緝捕無由遂致川粵私梟遍地充斥省鹽日多壅積自三十一年至三十四年共計墮運九百餘萬觔雖經奏明改撥追賠迄今未能清理現在省店存積之數尚多是鋪販營私阻塞鹽路十六州縣盡成食私之地延及隣封滋害甚大若不因事變通裁撤省店改立鹽倉責成官運定額分銷按城站之遠近立領運之章程鹽法殊難整頓臣查省店年銷黑井及安豐井鹽八百七十九萬一千七百餘觔其

中已經定額之南寧霑益尋甸宣威平彝等五州縣鹽一百六十三萬觔距井路遠應仍赴省倉官為領運其未歸官運之十六州縣內除昆明首縣年可銷鹽二百五十四萬餘觔近在省城原有額設官鋪應循照舊例先課後鹽仍令督鋪售銷至附近井地之昆陽晉寧呈貢宜良嵩明江川河陽路南八州縣年可銷鹽二百六十萬觔應令該地方官自雇夫馬赴井領運即於原定自井至省運脚內計程通算攤給又距井較遠之馬龍羅平陸涼廣西彌勒師宗邱北七州縣縣丞年可銷鹽二百二十餘萬觔應令該地方官自雇夫馬赴省倉領運其自省至本處脚價從前因係鋪販領運轉銷未便一體議給准將領運之鹽以九十觔勻賣百觔每觔復按站遞增一文以抵折耗脚費之用伊等遂得明加暗扣計息取盈漸至市價增昂民苦

食貴惜小害大弊累日深今既改歸官辦所有前弊俱當釐剔飭禁其需用脚價店費應請即於原定新增鹽價及加添運脚內裒多益寡有無盈縮通盤核計彙案定議辦理以上十五州縣應完課款俱令上月領鹽下月解課與迤西成例畫一遵行按年計入考成冊內造報再彌勒一縣既銷省鹽其加買粵鹽三十萬觔應行停止以杜影射之弊如此畫地行銷各屬均有定額民間買食遠近均霑在官各顧考成留心查緝私販自無從竄入鹽井似可免壅積之患矣

一井地借欠盜賣應嚴加懲治以除積弊也查各井散酒熬煎及各屬赴領發運均撥家人書役分理其事每與商灶勾通滋生弊竇緣井鹽未經鋸運以前係本井家人書役經營每日灶戶熬獲鹽觔止驗日煎之數有無短缺仍

聽本戶自行收藏直至配運時呈繳公倉秤明登簿以鋸為收並不先期封貯以致灶戶勾通人役透漏分肥無從查究此鹽觔存井之弊難清也至已經鋸運之後係各屬赴井家人書役經營每日領出鹽觔不即僱脚趨運停積坊店日久走滷消耗計圖出脫或借給灶丁以交日煎之額或借給脚戶以抵別屬之鹽甚至通同盜賣轉輾虧挪此鹽觔存店之弊混難清也更有借欠之鹽井司每多袒庇商灶延擱不追盜賣之鹽地方官並不嚴查緝究重治其罪伊等遂愈勾串作奸肆無顧忌應繳課款懸欠纍纍臣查各井額辦自數十萬至數百萬觔不等逐日煎獲鹽觔即應令其入倉各列字號堆記封鎖俟輪值鋸運時秤明作收則灶戶挪掩透漏之弊可杜鹽觔發運井員應即知會領銷州縣速飭原派差丁將脚戶姓名住址發鹽日

期數目開單具報計日查催逾限不到即行根究不使日
久停留則折耗借賣之弊可除臣現在嚴切通飭並查各
井如有未設鹽倉者詳明籌款添設咨部辦理存井未運
者催令雇脚趨運按旬開報盜賣借欠各犯查封家產變
抵勒限審擬按律懲治如提舉大使州縣等官奉行不力
即分別參賠以儆玩愒

一嚴禁灶戶攙和沙土以清墮誤之源也查滇屬大小各
井官給薪本督灶熬煎自應澄清滴水濾淨渣滓始可入
鍋成鹽之後並頒內外烘燒乾透方可配運乃近年灶戶
藉稱油短薪艱不將渣滓濾淨夾帶泥沙煎熬成塊又有
未經煎乾多藏水氣之弊以致鹽質未淨鋪販亦得藉口
重煎折耗私行抬價病民各屬民戶附近川省者則買食
川鹽附近粵省者則買食粵鹽價雖較昂民間利其質淨

味鹹咸願舍賤食貴此私鹽充斥官鹽愈滯節年墮運墮
銷之所由來也查提舉大使等官職司醜務督煎是其專
責乃一任灶戶夾帶營私敗壞鹽政若不明立處分無以
共昭懲創查滇省鹽政向來只定墮煎議處之條至灶丁
攙和作何究治未著明文應請嗣後井官縱容灶丁攙和
沙土提舉大使比照白土攙入漕糧運弁與押空千總不
行查禁灶戶比照丁舵已經攙和例分別議處究其失於
覺察者井員量減一等若知情受賄照枉法贓私從重治
罪在井查出勒令灶戶照數改煎發運出井著落井官名
下追賠如承銷各州縣明知鹽飭攙和瞻徇容隱一體著
賠叅處仍飭各井員於每年開煎時將樣鹽送臣衙門驗
發鹽道收貯如分發各屬行銷仍有夾帶泥沙許各地方
官即將原鹽呈驗嚴查究叅庶井鹽純淨鋪販無由藉口

抬價一切墮誤之弊可期漸除矣
一官鹽煎運售銷均應立法稽查以儆玩愒也查滇省年
辦額鹽自井司起煎州縣領運行銷之後方能解課稽查
不密即多墮誤查督煎經徵分別完欠每年奏銷案內定
有考成乃近來墮煎墮運墮銷積至數百萬觔前累未清
後弊踵至雖有處分嚴例轉若視為具文細查其故總由
平時漫無考核以至日引月長遂成不可補救之勢臣檢
查舊案從前考核成法煎辦鹽觔數目責任井司運銷解
課數目責任州縣各屬按月造報完欠釐然查催甚易是
以歷年從無墮誤自三十一年以後月報擱置不行間有
造送亦多缺漏參差難以綜核廢弛因循上下蕩無法守
直至墮積數多始行參賠已屬補救不及伏思歲會月計
不厭周詳滇屬大小鹽井各有月額應煎鹽數灶丁按日

領酒煎交月終彙核盈縮自見如果較額有餘准其留抵
下月收數若煎辦不足勒限下月補交頒式發井按月填
單申報由鹽道核明彙造一冊申送督撫備查年終通計
一次將逾限不及趨煎者分別參處果能隨時清理則墮
煎之弊似無難於立除至行銷州縣上月銷鹽下月解課
定數分限舊有成規其額鹽已銷未銷已運未運在途存
井各數及課款已解未解鋪欠存庫各數日異月新滋弊
尤易俱應截清年月分發簿單勒令州縣依限填報鹽道
逐一核實有無墮誤按月轉報督撫分別功過以示懲勸
俾上下謹於考核即墮銷墮運之弊亦可依限清釐矣
一嚴申私鹽之禁以疏墮銷也查滇省北連川蜀東抵廣
西照通東川二府屬例食川鹽廣南開化二府屬例食粵
鹽各分疆界越境售銷即以私論自乾隆三十一年以來

因夫馬缺乏各井鹽餉墮運內外私販乘機竊發其由照通東川越過曲靖雲南等府界內者為川私由廣南開化越過彌勒延及徵江等處界內者為粵私官鹽存井影射透漏者為灶私領運在途停攔偷賣者為脚私因循至今遂成極重之勢查灶丁夾帶私鹽鹽徒越境與販分別懲治定例綦嚴滇省雖有分差緝捕之名究無獲犯治罪之實關津隘口又復巡查懈弛以致梟犯充斥肆行無忌課款懸宕率由于此查隣私竄入各有經由津隘應飭查明於涯歸總路分設巡鹽弁員酌帶兵役駐劄專司緝捕巡獲鹽餉即行通報一面交地方官審擬毋許擅自率結至本地私販夥同脚夫勾連灶戶到處皆有無弊不作在井透漏則責成提舉大使在途透漏則責成經由州縣嚴密稽察獲犯到案照例治罪如井員地方官緝究玩廢分別

失察知情叅處俾外梟不敢侵越內販咸知斂踪庶行銷額鹽不敢再有壅積矣

一各屬墮銷墮運鹽餉應行區別分年帶銷也查滇省原額辦鹽三千六百一十三萬餘餉應徵課款及支給薪本運脚等銀九十五萬六千餘兩乾隆十八年題定章程以後歷係年清年款自三十二三四五等年因馱馬缺乏額鹽墮積課款稽延經前署撫臣諾穆親查明墮運墮銷及在途停攔鹽六百三萬八百餘餉奏請勒限一年責令新陳趨運行銷經臣等查明墮誤鹽數實止五百五十五萬二千二百餘餉勒限逼迫仍恐壅滯轉與年額有碍請分限二年帶銷會銜具奏在案今臣復加細查各屬積壓鹽餉有不及年額應銷之數者有逾于年額應銷之數者墮誤多寡懸殊售銷難易迥異若不分晰區別概行勒限二

年新陳並銷閩閩計口投食斷難以一歲而茹兩載之鹽勢必舊鹽未銷新鹽復墮舊課未完新課復欠殊非清釐積欠之道伏思辦理必期核實立法務在可循陳鹽積壓既已墮誤於前當思善籌於後始可徐收實效臣不敢因已經具奏稍為迴護復同督臣商推應請將新陳並銷之鹽按照各該處年額再行區別分立限期如墮運鹽餉不及年額三分以內者仍照原限勒令一年帶銷全完墮運在應銷年額一半以上者分作二年帶銷至墮運逾于應銷年額者分作三年帶銷墮運倍於應銷年額者分作四年帶銷即於奉到部覆之日起按限計入考成案內分別完欠數目核實叅處庶墮積數少之處得以趕銷完課墮積數多之處亦可逐漸清釐現年應銷鹽額並不致有壅滯即揆之分年帶征舊欠錢糧例意亦屬相符如蒙

恩允臣謹將各屬墮運墮銷鹽餉數目應行分別帶銷限期造冊送部存查遵照辦理

一墮運鹽餉分撥附近井地州縣代銷請再量加酌減也查黑井提舉黃輔任內墮銷存井鹽五百二萬一千六百五十觔白井提舉高其人任內墮銷存井鹽一百八十八萬八千觔計共六百九十萬九千餘觔例應請省店行銷因積滯數多曾經奏明撥給附井行銷各州縣代銷分限三年清完課款在案臣抵任後節次飭催該州縣照撥領運均以本處新舊鹽餉現尚難以疏銷詳請酌減改撥前來隨復檢案細查附井大姚等屬俱有年銷額款又有積年墮運舊鹽若令再代省店照撥全數售銷殊為過多勢必仍至壅滯終延課款似應另籌改撥查省店前因額鹽積滯議請附井各屬代銷令黑白二井餘鹽暫停收買省

店已減銷七十六萬觔現將正鹽內撥給阿迷州十萬觔
 連水縣三十萬觔祿勸縣每年共減銷正餘鹽一百二十
 二萬觔額數既少今議裁撤省店官運分銷陳鹽即易疏
 通應請將原撥附近各屬代銷六百九十萬九千餘觔內
 收回一半鹽三百四十六萬觔仍歸省店分撥行銷照依
 原限三年完解清款庶晉寧等一十六州縣鹽觔不致短
 缺而附井大姚等屬代銷減數亦將本地額鹽及積年墮
 運趕緊疏銷酌盈濟虛似應隨時籌辦俾課款早清以免
 滯誤

一墮煎餘鹽應暫停緩以紓灶力也查井地收買餘鹽原
 因酒水濃旺又值冬春雨少柴薪充足之時灶戶煎交額
 鹽之外尚有零星餘剩自十觔至數觔不等官為收買既
 杜私售偷漏之弊兼可裕民食而濟灶戶因隨時調劑原

難定為徵收之常額且額煎之數攸關正課而收買之鹽
 係屬盈餘其款項輕重亦有區別乾隆三十六年參革提
 舉黃輔任內墮煎黑井正額鹽二百三十五萬六千二百
 餘觔參革提舉高其人任內墮煎安豐井正額代煎等鹽
 三百七十六萬一百餘觔經督臣彰寶奏明分限五年帶
 煎並將該二井收買餘鹽一百二十二萬觔權度輕重暫
 停收辦俾灶戶省出餘鹽帶補舊額籌畫已屬周詳惟黃
 輔任內尚有少買黑井餘鹽二百四十六萬三千一百二
 十五觔於參案原招內聲明帶煎補額臣思井員經理不
 善既虧正額安得復有餘鹽原議補煎正為積餘銀兩有
 關經費未便遽行停收起見但查該井現在已有帶煎正
 額鹽二百三十五萬餘觔若復責令補辦餘鹽恐轉滋挪
 前掩後攬和充數之弊應請將該井墮煎餘鹽暫緩收買

俟照奏定原限補煎正鹽全完之後再行分年補收足數則經費仍無缺灶力得以從容矣又查安豐井每年停辦餘鹽止六十二萬應帶補舊額鹽七十五萬二千餘勛省出餘鹽不敷帶補之數井灶未免竭蹶應請將該井帶補舊額鹽勛照每年停辦餘鹽之數帶煎以紓灶力似與醴政有益

一鹽課借墊軍需遇有核減銀兩應請另案查追也查滇省二十二三等年各屬承辦軍需俱係赴司領項其中有因差務緊急未及赴領檄飭先行借墊者滇屬州縣別無存款多係借支鹽課每逢新舊交代即將墊辦銀數查明抵交迨事竣造報其例應准者即在軍需銀內撥還清款遇有核減仍照長支銀數追解惟是核減應追之員遷調事故多非本任前官長支之項後官不能代為解繳遂於

鹽課奏銷案內仍行造入未完項下名為鹽課未完實已軍需動內若不急為清釐仍行籠統開造不特完欠數目不清且各員經手墊項易於糾纏諉延應追課款亦難分晰歸結辦理似未妥協臣愚昧之見應請將各員經手軍需項下墊用鹽課銀兩自乾隆三十二年起到三十四年撤兵以後止查核從前案據逐一清釐按其核減銀數另案勒追繳解遇有遷調事故各員分咨任所原籍著追即由各省報部撥用並於三十六年鹽課奏冊內分晰開除以清動款庶各員墊項可免牽混而國帑亦不致有懸宕矣

一加增薪本運脚數目應再確勘核定以示均平也查滇省大小鹽井從前議給薪本運脚各按井地情形酌中定額近因黑白安豐等井每年煎鹽最多不敷薪脚較甚曾

經督臣彭寶奏明每餉加增鹽價四釐以為添補薪脚之用現在黑白安豐三井每百餉加給薪本銀一錢二分五釐並增黑井鹽餉運省脚價銀三錢安豐井鹽運省脚價銀三錢五分南寧霽益宣威平彝四州縣雇脚領運於原定每站脚價一錢之外各加銀五分酌籌調劑已屬公溥其餘各井屬尚有油淡薪艱運脚不均紛紛呈訴者自應通盤籌畫臣伏思井地有大小之分煎運有難易之別小井年額辦鹽數十萬餉所費薪脚尚少大井年額煎鹽數百萬餉所費薪脚倍多費少則價平費多則價貴此實理勢所必然前因灶戶脚夫力難支持致啟偷漏營私挪借抵額並堆積在井渣酒折耗發運在途盜賣逃走諸弊是以議增鹽分給添補以甦灶困而省運累乃現查各井已添未添均有不敷是否得隴望蜀遂萌無厭之求抑或酌

盈濟虛尚須挹注之處非親歷井地核實薪價審定運費確勘現在情形有無弊竇徹底清釐無以折服其心且臣請裁省店改歸官運內尚有應行酌給脚費均須裒多益寡通盤核算始可以定鹽法之準臣現擬前赴大井親督煎驗細查酒水之盈縮核計需薪之多寡順勘程途之遠近夷險並委道府分往中小各井一體確勘彙核定議俾不敷較少之區無致冒濫不敷較多之處並免偏枯容俟查明分晰奏銷定辦以上各條就臣管見所及據實敷陳以期仰副 聖主整飭鹽政之至意是否允協謹會同督臣彭寶合詞恭摺具 奏

請定例禁疏乾隆三十七年

歐陽永琦

江西按察使臣歐陽永琦跪 奏為敬陳江右民間陋習請定例禁仰祈 睿鑒事竊照江右民風素稱勤樸惟

習俗相沿尚有數端於倫常風化殊有關係非酌定限制立明科條難以望其悔改臣故為我皇上陳之一請立遷延不葬之禁以厚倫常也竊查殯葬一事古人以三月為期乃臣體訪江右地方無論紳衿庶民之家竟有停棺至數十年之久一家之中積至數口之多而不葬者皆由土人畧知地理率號專家妄謂禍福窮通地操其券於是有力者多方購取無力者惟事因循相習成風迷而不悟伏查雍正十三年十二月二十四日奉 皇上諭朕聞漢人多惑於堪輿之說購求風水以致累年停柩漸至于孫貧乏數世不得舉葬愚悖之風至此為極嗣後守土之官必多方勸導俾得按期埋葬以妥幽靈以盡子職此厚人倫美風俗之要務也各凜遵毋忽欽此 聖諭煌煌至為愷切再查律載有喪之家必須以禮安葬若惑

於風水托故停柩在家經年暴露不葬者杖八十等語是無故停棺不葬有干罪愆乃歷經勸諭查禁而此風終未改革臣愚以為欲挽其習必定限而嚴其罰應請嗣後殯葬之期定以期歲遲亦不過二十七個月倘過期不葬如係舉人貢監生員不許應鄉會試應補應陞人員不准請咨選補倘敢諱匿應試選補一經發覺除照例治罪外舉貢生監斥革官員罷職不用其閭閻小民著地方官於公出之便隨時查看勒限舉葬故違不遵即照例杖懲庶士民咸知儆惕而錮弊可以挽回矣

一請定溺女治罪之專條以懲殘忍也父母之於子女毛裏原無彼此之分乃江右素有溺女惡習或因家計貧乏憲目前之撫養維艱即家計稍豐亦憲將來之遣嫁滋累並或急望生男恐為乳哺所誤遲其再孕往往甫經產育

旋即溺斃恬不為怪歷經嚴禁終未革除總由弊俗相因於舉發懲創之例未有專條應請嗣後凡有生女溺斃者照故殺子孫之罪杖八十徒一年族隣保甲知情不行救阻照知人謀害不即阻當律治罪如此明立科條俾愚民共知儆懼不敢輕犯所全生命實多矣

一請嚴錮婢之禁以維風化也男婚女嫁人倫肇始良賤雖殊情無二致乃江右士庶之家所蓄婢女有至老不得配偶者饒州贛州二郡為多蓋緣婢女自幼購養及其長成利於指使熟習遂至指留不嫁查定例紳衿庶民之家如有將婢女不行婚配致令孤寡者照不應重律杖八十是錮婢雖有治罪之條而不為定立年限終得捏混遷延臣請嗣後遣嫁婢女以二十五歲為限如逾期不嫁許婢女之父母及地隣人等隨時舉報除照例治罪外將婢女勒令婚配追銷身契原買主不許索還身價庶使蓄婢之家不致任意錮留似於風化之防不無裨益矣以上三條臣為江西一省積習起見不揣冒昧臚列瀆陳其他省有似此者亦請一體查禁伏祈 睿鑒

皇清奏議卷五十九

Blank lines for text in the right column.

Blank lines for text in the middle column.

Blank lines for text in the left column.

67
116
481

終

